

四庫全書

集部

欽定四庫全書

集部

忠肅集

目錄  
卷一

詳校官編修<sub>臣</sub>翟槐

中書<sub>臣</sub>劉源溥覆勘

總校官檢討<sub>臣</sub>何思鈞

校對官中書<sub>臣</sub>宋枋遠

謄錄監生<sub>臣</sub>許溶

欽定四庫全書卷

集部六

忠肅集目錄

別集類五  
明

卷一

奏議  
北伐類

卷二

奏議  
北伐類

卷三

奏議  
南征類

卷四

奏議

南征類

卷五

奏議

雜行類

卷六

奏議

雜行類

卷七

奏議

雜行類



卷八

奏議 雜行類

卷九

奏議 雜行類

卷十

奏議 雜行類

卷十一

詩

卷十二

序

賦

記

贊

祭文

臣等謹案忠肅集十二卷明于謙撰謙字

廷益錢塘人永樂辛丑進士授御史厯官兵

部尚書英宗復辟為徐有貞石亨等誣陷棄  
市成化初追復原官弘治初贈特進光祿大  
夫柱國太傅謚肅愍萬厯中改謚忠肅事蹟  
具明史本傳倪岳撰謙神道碑稱謙平生著  
述甚多僅存節菴詩文稿奏議各若干卷禍  
變之餘蓋千百之什一云云是其沒後遺稿  
已多散佚世所刊行者乃出後人掇拾而成  
故其本往往互有同異明史藝文志載謙奏

議十卷李賓編又文集二十卷又嘉靖中河  
南刊本詩文共八卷而無疏議此本前為奏  
議十卷分北伐南征雜行三類當即李賓所  
編後次以詩一卷雜文一卷附錄一卷與藝  
文志所載多寡不合然核其篇什亦已罕所  
遺脫蓋編次者分析之不同也謙遭時艱屯憂  
國忘家計安宗社其忠義烈固已昭著史  
冊而所上奏疏明白洞達切中事機尤足規

其經世之畧至其平日不以韻語見長而所作詩篇類多風格邁上興象深遠轉出一時文士之右亦足見其才之無施不可矣又案王世貞名卿續記及李之藻皆謂謙嘗再疏請復儲今集中並無此疏明史亦不著其事惟倪岳神道碑稱景帝不豫謙同廷臣上章乞復皇儲是當時所上乃廷臣公疏非謙一人故集中不載其稿世貞等乃專屬之謙殆

亦考之未審歟乾隆四十六年九月恭校上

總纂官

臣紀昀

臣陸錫熊

臣

孫士毅

總校官

臣

陸

費

墀

欽定四庫全書

忠肅集卷一

明 于謙 撰

北伐類

兵部爲陳言邊務事該鎮守大同叅將都督僉事許貴  
奏查得正統十四年十二月內節該欽奉詔書內一款  
朝廷求言本欲聞善道知警戒凡四方災異事干國體  
者所在官司即時聞奏欽此欽遵臣照得大同三路自  
舊歲七月以來至今達靼不時攻圍四散搶掠臣守西

路地方又係緊關衝要敵行四通道路節次侵犯攻圍  
臣領所部官軍相機截殺追趕累次奏報外切見邊城  
軍民赴空樵採柴草搶割田禾度日不爲經常之道即  
目正當農種之時雖令各人照舊耕種但聞邊墩不時  
舉放砲火人心驚恐自不安生況今達靼聚集人馬衆  
大少者五七千多者一二萬整陣入境攻圍各城在邊  
軍民人等不敢出城樵採收割又無經營各衛倉廩舊  
歲民間該納秋夏糧料草束爲因路阻運送不前見在



邊儲官軍馬匹按月支給有減無增再照西路五衛馬  
隊原有官軍四千九百二十員名先於乾河等處與達韃  
對敵陣亡中半回衛見在者又有被傷旗軍告令弟男  
替代俱係未經操習戰陣之人舊役慣戰馬軍十無三  
四又況見在馬匹止有二千一百餘匹中間多有新例  
借勸收買兒騾小馬不堪騎戰十有二三比與原舊馬  
數缺少二千八百餘匹及照本年二月內臣差千戶張  
鑑管領無馬官軍一百八十一員名前去墳嶺墩設伏

有敵到墩攻圍未戰之時內有敵騎三人通曉漢話叫稱我一箇是女直同知一箇是浮石叅謀一箇是哈密指揮我來近墩打話你每聽著要講和著管你每的大頭目奏將去連夜差使臣來我每便回去你若不來講和我每三班人馬輪流打攪你不得種田等因已行具本奏報外今敵聚衆復入境內擾攘軍民不得耕種切慮四月以後青草茂盛倘若敵勢衆大就於腹裏駐劄趁草牧馬城門關閉人不得樵採馬不得牧放欲便興

師戰鬪尤須量已料敵設若寡不敵衆如之奈何臣一  
介魯夫昧於戰守誤蒙聖恩濫叨今職晝夜懷憂不能  
補報伏望皇上憐憫在邊軍民乞勅在廷内外文武大  
臣將前項打話敵人要行講和情由從長計議便利上  
策分免聖主之憂臣之愚見莫若遣使賞勅與彼假以  
和好爲詞暫示休兵照舊修飭墩隘廣積邊儲練習士  
卒飽養馬匹密定討伐之計若彼仍復逆天背理侵犯  
邊城我既有備以逸待勞守邊將官運謀出奇統率銳

士奮力復仇務在一鼓而擒之必矣具本該通政使司  
官奏奉聖旨兵部知道欽此抄出到部查得先該福建  
道問刑監生練綱題稱在廷文武羣臣中間有以主和  
議爲詞即是奸臣就乞誅之勿留誤國等因節該奉欽  
依他說的是欽此續該迤北走回軍餘陳旺等說稱要  
差內使一人通事五十人去迎太上皇等因本部叅係  
重務乞會多官計議節該題奉欽依敵情譎詐不必會  
官計議欽此欽遵今都督僉事許貴又奏要與彼講和

暫示休兵待人馬強壯密定討伐之計一節切詳敵首  
額森違天悖德負義忘恩自逞梟獍之雄烏合虎狼之  
衆既侵犯邊境而拘留上皇復入寇京畿而震驚陵廟  
其爲仇恨庸可勝言且以和議一事論之當去年秋冬  
之間正敵勢方張之際朝廷亦嘗遣都指揮李鐸指揮  
岳謙等賫執金綰往使邊庭賄賂纔入於穹廬敵騎已  
至於關口繼遣少卿王榮通政王復又往敵營不見上  
皇鸞輿而還彼衆知我戰守有備尋皆望風遁去朝廷

灼見敵情謫詐和不足恃以故絕使不通往還惟勅邊將修武備勵人心固守城池相機戰守今許貴又奏和議之說臣等竊惟今日之事理與勢皆不可和何者今我與彼有不共戴天之讐和則背君父而忘大義此理有所不可和也又敵人貪而多詐萬一和議既行而彼有無厭之求非分之望從之則不可違之則速變此勢有所不可和也苟以爲敵強難制姑從和以緩其兵臣等請質之前代宋真宗澶淵之役契丹之衆累被我兵

推阻既盟之後朝廷尚歲輸銀絹三十萬兩足迨及季世徽欽北狩中國名將如張韓劉岳之徒屢敗金師及奸臣秦檜一主和議朝廷既割境土以與之又輸歲幣以賄之甚則不得已降去尊號其爲含垢忍恥屈已從和固無所不至卒之人心解體國勢陵夷無救成敗而後已援古證今和議之不足恃也明矣爲今之計莫若選將練兵養威蓄銳彼若來侵則相機而勦殺彼若遠遁不貪利以窮追萬一敵寇罪惡稔盈鬼啓其衷復有

大舉入寇之謀則我兵操習有素加以將帥思奮臣等當盡死効力以圖勦滅以雪國恥必不至出彼之下其或皇天厭亂列聖有靈使彼自知數寇不利變惡爲善遣使入貢則示以善意量與賞賜遣回亦不拒絕而已若欲朝廷先遣使臣往彼通好則示彼以弱而啓其輕侮之心萬萬不可此則方今之要務而臣等之愚見止於如此也及照許貴叨居重任保障邊方不能銳意滅敵却乃倡爲和議畏縮之跡既明忠義之心何在合將



本官明正典刑以謝天下以戒將來緣係陳言事理又  
係備邊將官合無姑記其罪差人馳驛賫文切責許貴  
令其整飭邊務操練軍馬作興士氣固守地方必期滅  
敵以贖前罪如仍退縮誤事治以重罪仍通差人賫文  
前去遼東宣府大同陝西等邊及永平山海居庸白羊  
紫荆倒馬等關口總兵鎮守等項內外官員令其整搦  
人馬固守地方如遇外兵來攻務要相機行事毋得聽  
信哄誘因而失誤機務仍通行在京五軍三千神機等

營總督總兵等官嚴加訓練官軍諭以忠義大節使之  
感激思奮以圖成功不許苟且因循致誤大計緣奉欽  
依兵部知道事理具題景泰元年四月十九日奉聖旨  
是欽此

兵部爲邊務事內府抄出鎮守大同太監陳公題審得  
生擒達靼指揮布斯台供係克勒奇蘇人先因往衛拉特  
進貢就畱在彼住坐曾跟隨烏魯斯并察展三次來朝  
比先下番使臣回還之時額森安排筵席與馬清馬雲

送路令從人歌唱作樂有馬清等說不希罕我回去討一班笙簫細樂會唱的婦人來與你額森聽言歡喜後次又有使臣到彼和番額森令兒子出來勸酒有使臣亦說好與中國結親我回去奏知務要成事額森就進馬三匹不期使臣回去不見結親事情又無歌唱婦女因此發怒領兵前來廝殺見今在於小黃河駐劄時常發遣哨馬或多或少往南探聽聲息搶掠人口頭畜今次聞知石總兵領三十萬人馬要往迤北征進額森令

其弟賽罕王領一萬餘人牽騎馬二三萬匹前來緝探  
知得石總兵止領人馬三萬已回五日去訖來時額森  
分付就看腹裏人民種田不種各處城池有軍無軍又  
說額森時常議論不見中國差人講和若講和了時只  
差一二百回子將下番官軍并先搶人口分一半送太  
上皇回去若不講和一發般取家小就在沿邊住劄搶  
掠不回額森人馬通不及四萬餘人托克托布哈已回去  
了屢差人勸額森回還也先說稱中國整理軍馬要來

廝殺恐怕各枝人回散了急難再聚又說下邊小人兒  
心裏想家要回還老窩裏去審供得此行間又據節次  
被擄走回男子鄭道童等亦稱額森弟兄領人馬來大  
同答話相和若不和時五六月連老小都來大同周圍  
住坐七八月往大都十一月往寧夏搶掠又說要將搶  
得犁鏵安上木柄攻砲應渾懷仁等處土地等因會同  
總兵官定襄伯郭登叅謀軍事左都御史沈固右叅將  
潘興議得自景泰元年四月二十三日達靼入境往南

去後至今未回除差夜不收人等分投緝探及飛報武清侯石亨太監裴當等知會隄備外緣係敵情及傳報聲息具本差夜不收王鎖兒等於本月二十六日起程賫奏至二十八日早有王榮等回報行至聚落驛忽遇達韃數騎趕散王榮同馬夫張彥友被其剝去衣服奏本四封亦被搶去棄馬藏躲得脫回還內王鎖兒不知下落今將前奏情由具本差夜不收齊二敢勇餘丁鄧斌親賫具題該本部官欽奉聖旨兵部看了來說欽此

又該征西前將軍鎮守大同總兵官定襄伯郭登等亦題前事通抄到部叅照各官奏稱比先下番使臣馬清馬雲曾許其長額森討笙簫細樂會唱婦女及以後使臣到彼和番又許額森與中國和親一節除以後使臣別無開到年分職名無憑叅擬外臣等切見比年以來因托克托布哈王并太師額森等年例遣人朝貢朝廷厚加禮遇遣使報聘以示恩信篤和好也豈期差去使臣止知貪利以肥家不思屈節而辱國於敵情之虛實畧

不以聞禮義之大節全不暇顧及回還復命又復架捏  
虛詞誇大張皇肆爲欺罔甚至透漏消息而陰結敵人  
妄報根脚而希求陞賞以致外番放肆有輕中國之心  
邊境不寧釀成今日之禍今照馬清馬雲前項辱命緣  
由雖係擒獲達勒布斯台所說未可憑信然此事中外  
臣民知之已久事不妄傳必有所自若不明白處治無  
以痛快衆心合將馬清馬雲拿送法司嚴加勘問明白  
奏請定奪處治庶使典法昭明臣民稱快其言敵首額



森說稱若中國差人講和送太上皇回來等因顯是達  
剌益逞奸詐之謀故爲誕妄之說誘我邊將弛我邊備  
假以講和爲名意在乘虛深入合無差人馳驛賁文與  
大同總兵官定襄伯郭登等同守備鴈門偏頭等關都  
督同知等官杜思等嚴加訓練官軍用心守禦城池倘  
遇番兵侵犯務要効死盡力隨宜守戰不許聽信哄誘  
失誤事機仍令郭登等差人密切跟尋原差奏事人王  
鎖兒得見下落通行具奏及照差來夜不收齊二敢勇

餘丁鄧斌不避艱險奏報聲息勞苦可憐合無俱量陞一級以勵將來緣奉欽依兵部看了來說事理具題景泰元年五月十一日奉聖旨是欽此

欽差總督軍務少保兼本部尚書于謙爲預定安邊事照得宣府大同地方即目達靼侵擾去來不常或攻圍城池或剽掠人畜或以輕騎襲我輜重或以人少誘我官軍聲東擊西出此入彼邊民不得耕種士馬不得休息臣切料近曰必欲搔擾大同宣府使之公私匱乏不

能固守此其奸計不淺有必來侵犯京師之意今朝廷  
所倚任者石亨楊洪柳溥孫鏜衛穎范廣張軌數臣其  
次則署都督僉事張義雷通諸人今敵勢猖獗邊務方  
殷京師軍馬雖操練頗有次第然萬人之命懸於一將  
將有必戰之心則士有効死之力苟計不先定心不齊  
一彼此異見而將無必戰之心上下隔絕而士無効死  
之力緩急之間恐誤大計伏望皇上聖明乞勅石亨楊  
洪柳溥孫鏜衛穎范廣張軌張義雷通等各陳已見以

爲今日敵勢如此邊務弗寧當何處置萬一侵犯京師或近畿甸州縣及山西等處地方當何設法戰守或除戰守之外別有何策可以安邊保民不須會同計議文飾虛詞務在各出己長直言無隱令石亨等各另具題封進皇上聖斷采擇其可行者請勅各官遵守施行若是果有窒礙亦聽各官陳奏必期上爲朝廷分憂下爲邊境除患不許面爲承順退有後言敵至互爲異同以悞國家大計况耕當問農織當問婢今日之事若不責

成於石亨楊洪諸人而欲以臣等書生之淺見以爲議  
論則是徒爲紛紛而未能濟事也臣材本庸劣叨掌兵  
機切見方今邊務誠爲危急計慮預防間不容髮萬一  
事無豫定倉卒生變臣雖萬死不足以贖謹陳愚見伏  
候聖裁具題景泰元年五月十四日奉聖旨說的是宣  
府大同乃京師之藩籬敵情猖獗各處剽掠使我士馬  
疲困若不預爲處置愈生邊患便著他每各思長計如  
何安妥開寫來看欽此

兵部爲邊務事兵科抄出總兵官武清侯石亨題欽奉  
會同彼處總兵等官計議挑修溝塹擺布營陣築立墩  
臺撥哨隄備但見倉場糧料數少馬草全無今雖要官  
僱運爲因敵騎犯邊聲息不絕糧道阻滯大同并應州  
等處糧草纔勾三萬餘石束恐被大軍食用消費大同  
官軍日後缺乏愈難存住臣會同太監裴當右僉都御  
史任寧計議將原領官軍於內挑選次等馬步官軍共  
一萬五千餘員名委都指揮田貴等管領前去易州保

定等處牧放住劄已行具奏外乞勅該部計議合無將前項官軍調取回京惟復只在保定等府有糧去處操守遇有番兵過山侵犯京師臣等就便調領往衝要路口隄備會合京軍夾攻勦殺庶保萬全倘欲再添調大兵前來大同糧草十分欠缺不可輕易及山西民壯亦合暫且存留代州令都指揮翁信提調操練候有緊急調取策應庶爲兩便係干邊情具題該本部官欽奉聖旨兵部看計議停當來說欽此欽遵抄出到部叅照武

清侯石亨奏稱彼處糧草不敷已將原領馬步官軍挑選一萬五千餘員名令都指揮田貴等率領回還保定易州有糧草去處操守牧放遇有敵兵侵犯會合夾攻一節切詳足食者足兵之道治內者攘外之本今既本處糧草供給不前而京師亦當增兵操守合無將前項退回官軍不必在於保定等處屯駐令該府差人沿途催趕田貴等就令率領赴京操練隄備不許在途延緩及照大同地方係西北重地合當嚴謹守備今本處所



積糧儲有限日逐支用無窮又兼馬草全無措辦而敵情譎詐倘聞知石亨等率領大軍在於大同城內住劄分遣餘衆剽掠牽制我軍使其內外隔絕應援不繼意在乘虛寇襲趁此青草未發之時番人馬匹瘦弱之際若不設法處置非惟師行日久而財用匱乏抑且京師有警而缺人調用合無請勅石亨令會同彼處總兵鎮守等項內外官員定襄伯郭登左都御史沈固僉都御史任寧太監陳公等從長計議如果彼處邊備整理已

有次第見在糧草委實不敷其石亨所帶官軍應合回京就便會本差人馳奏將石亨取回其所帶官軍內挑選精壯者一二千或三五千俱與遊擊將軍都指揮石彪兼同原帶官軍五千員名仍在大同協同郭登等巡哨相機行事候邊境寧謐另行具奏取回其餘官軍一同石亨回還不許猶豫不決致貽方來之患其言要將山西民壯暫畱代州操練一節委的內外兩得其便亦合准擬將山西府縣所選大同民壯合去代州聽守把

鴈門關副都御史朱鑑都指揮翁信等調度操練遇警  
調用仍加意撫恤不許親管官員人等生事虐害因而  
逃竄緣奉欽依兵部看計議停當來說事理具題景泰  
元年四月十五日奉聖旨是欽此

兵部爲備邊保民事戶科抄出都察院司務陳典庸題  
近蒙兵部題准以臣所言防邊禦兵恢復仇讐事件俱  
各有理令赴大理寺卿孔文英都督同知顧興祖處計  
議備邊方略臣自到關以來所見達韃經過去處草房

焚燒人跡蕭疎十室九空逃亡未復追惟往事實是寒  
心但以識淺才疎言輕行寡不足以救目前之急然以  
大勢觀之今易州蔚州渾源昌平等處近邊百姓自去  
歲被達靼殺掠人口搶去頭匹至今緊急雖有城郭山  
寨聊且安身而口外屢報聲息未得安居即今五月將  
終天氣亢旱種子少布何敢望收恐至失所朝廷難盡  
賑濟又且各口軍士微弱不堪持重衣甲器仗尚有未  
全倘使達靼乘虛深入雖不敢輕犯邊關未必不侵擾

邊民近聞大同等處城門日閉樵牧斷絕四境之外俱  
爲兵衝人民乏食何以全生况兼兵掠中原婦女更多  
遂成生育不過數年其數數千倍矣其無涯之釁可不  
爲之遠慮乎爲今之計貴在宣揚威武慎守封疆以固  
國本合無於宣府大同等處廣儲糧草似若防秋仍勅  
總兵官各率大軍於極邊去處屯駐邏勦此誠切於事  
體非惟應援京師其實保障中原使達靉遠遁而不敢  
再肆侵掠此亦兵家計畫之一端也至於復讐姑待事

集然後別舉但恐變詐多端遲留竊發果於深入不待  
秋高馬肥則必藉此二軍部曲堅重迭相犄角一則畏  
我躡其後二則畏我搗其虛使彼計窮力疲不能偷踰  
宣府大同之險而來設使二處無備勢必內驅不獨邊  
民被其殘擾抑且中原爲其驚恐臣愚不足以計邊務  
伏乞聖斷於短中取長而行之緣係邊備保民重務不  
敢緘默具題該通政使司官奏奉聖旨說的理當備邊  
禦敵國之重事宣府大同切近京師達輶恃其輕騎在

彼剽掠朕慮邊患如此便著戶部兵部計議糧草如何  
措辦軍馬如何戰守只在今秋事有成效邊境寧息務  
要區畫停當上緊來說欽此欽遵抄出到部除糧草戶  
部另行外叅看得陳典庸奏稱要令總兵官各率大軍  
於極邊去處屯駐邏勦一節臣等切詳防邊禦敵之策  
固在於增兵然必食足而後可以戰守也今照宣府大  
同係西北重鎮合當遣將增兵協濟守備但彼處各城  
所積糧儲不繼聲息緊急欽命鎮朔大將軍總兵官武

清侯石亨等往大同整飭邊備命遊擊將軍都指揮同知楊能總兵官都督同知范廣等往宣府巡視懷來一帶爲因糧草不足以給軍馬難於駐劄以此將范廣石亨等取回存畱楊能在彼巡哨及遊擊將軍都指揮僉事石彪又將所帶官軍內威遠衛畱一千馬邑所畱六百山陰所畱五百員名今盛暑方隆之際石亨等初回之時軍馬之勞困未甦道路之供餉未備若再選將調軍前去宣府大同屯駐非惟二處糧儲愈爲耗盡抑且



虛勞士馬迄無成功及查宣府大同在城官軍亦勾守  
備而京城守禦爲重軍馬未可輕動合無行移該府差  
人馳驛賫文與朱謙郭登等令其整飭人馬固守地方  
遇敵來攻務要相機守戰若是敵人深入亦要計度邀  
截設謀襲取以成夾攻之勢而圖勦滅之功既不許畏  
縮而拘於守備亦不許輕易而果於追逐務在計出萬  
全事無一失仍行紫荆倒馬白羊偏頭鴈門等關口守  
備官員及鎮守易州等處總兵等官都督同知劉安右

僉都御史曹泰等一體提督官軍晝夜用心巡守外爲邊境之應援內爲京師之屏蔽并今在京五軍三千神機等營總兵等官石亨楊能柳溥等嚴謹操練官軍時常點看器械馬匹候今秋若有邊報緊急另行陳設方畧奏請調兵殺敵若武藝未精士氣未振必須以身先率教閱振作諭之以大義申之以軍令使下有所感發自然所向成功不許姑息苟且自沮軍法及推稱軍弱自餒其志以致上下成風怠慢臨期舉手無措因而失

悞大事如違治以重罪緣節該奉欽依務要區畫停當  
上緊來說事理具題景泰元年五月二十七日奉聖旨  
是欽此

兵部爲緊急軍情事內府抄出鎮守大同西路右少監  
韋力轉題景泰元年五月十七日十八日達靼臨城攻  
圍臣同右叅將許貴二次出兵殺敗番衆往東去訖十  
九日據被虜放回餘丁劉四說稱達靼四千人馬在於  
本城迤東二十里住劄牧馬說額森兄弟到六月初一

日前來大同講和就送大明皇帝來大同住坐鐵頭太師坐右衛右頭城托克托太師左衛左頭城放回你去將這番字一紙箭一枝送與你城裏諾延知道等因又多寫下牌檄分占牧馬地方緣係番字邊情不敢緘默今將番字箭枝共進具題該本部官欽奉聖旨兵部知道欽此欽遵抄出到部叅照所奏顯是敵首額森等假以送太上皇爲名詐令餘丁劉四回還傳說意在緩我邊備以圖乘虛襲取若不預爲隄備誠恐倉卒之間彼處

鎮守總兵等官智慮不及處置乖方有誤大事合無請  
勅太監陳公定襄伯郭登左都御史沈固等公同計議  
如法整搦軍馬撫綏人民晝夜隄備固守城池如遇敵  
人率衆到於城下務要相度敵情緩急事勢可否以爲  
守戰凡一應事務當以朝廷宗社爲重不可聽信哄誘  
因而失誤大事果有別項難以處置事情星馳差人作  
三四起賫本具奏定奪以防中途衝截疎虞之患務在  
十分用心毋得怠忽誤事緣係區處邊務及奉欽依兵

部知道事理具題景泰元年六月初九日奉聖旨是欽此

兵部爲聲息事內府抄出鎮守宣府等處內官監左監丞栢玉題景泰元年四月二十一日辰時據夜不收呂關兒等走報本月二十日卯時有達靼三百餘人馬從石峰口入境隨即放砲二箇關兒等那往北山潛伏瞭見番人到關將南北門樓二座放火燒毀又有番人哨馬五十餘騎到於洪贊口本日申時各番仍從石峰口

出境去訖據報得此臣會同總兵官左都督朱謙等議  
係番人出沒事理除行都督范廣并守備懷來永寧都  
指揮楊信等整搦軍馬相機行事及行沿途哨守官軍  
嚴加隄備外具題又該提督軍務右副都御史羅通鎮  
朔將軍總兵官左都督朱謙等俱題前事該本部官欽  
奉聖旨范廣羅通於懷來駐劄相離長安嶺路途不遠  
達靼入境拆開邊牆燒毀門樓又縱容出去兵部看了  
來說欽此欽遵通抄到部案查先爲達靼入寇已經具

奏欽命都督同知范廣充總兵官都察院右副都御史  
羅通提督軍務率領馬步官軍二萬一千員名前去勦  
捕續該羅通題稱宣府節報聲息動稱幾萬餘騎官軍  
到彼不過一二百餘軍哨則去軍回則來意在疲憊我  
師今口北天色高亢青草未長舊草尋盡合無班師回  
京等因本部又經議擬奏准行令羅通公同范廣等從  
長計議如果本處邊情不甚緊急所蓄糧草支給不敷  
所帶官軍應合回還就便全軍臺營而還若聲息緊急



未可輕動明白回奏去後今奏前因切詳范廣羅通率領重兵巡邊殺敵已經四十餘日累於長安嶺等處遇敵多有二三百少不過三二十不能擒斬一人反被射傷官軍今照前敵止是三百餘人縱橫入境將關門拆開門樓燒毀仍從本口出去進退自由如蹈無人之境從容按轡全無畏忌之心蓋因范廣羅通平日紀律不嚴戰陣無勇既不嚴督邊關官軍謹慎隄備又不挑選士卒出奇截殺以致番人肆輕侮之心關隘失守禦之

策似此縱敵失機遂巡畏縮合當問罪及照總兵叅將等官都督朱謙等與遊擊將軍楊能等遇警不行救應俱屬失機誤事亦合問罪但即目邊務緊急各官見統大軍在彼巡哨若便提問誠恐缺人提督軍馬愈加誤事合無請勅切責范廣羅通令其且未回京并朱謙楊能等整搦人馬哨探邊情若敵騎仍前在邊出沒各要選帶精銳官軍或躬親督領或委偏將相機行事運謀設法或夜襲敵營或按伏要害祛除邊患以贖失機之

罪不許虛勞士馬糜費糧草暴露日久卒無成功如違一體治以重罪緣節該奉欽依兵部知道事理具題景泰元年四月二十四日奉聖旨是欽此

兵部爲軍務事兵科抄出鎮守陝西興安侯徐亨等題近准寧夏總兵官征西將軍都督同知張泰等手本景泰元年四月十一日節該欽奉勅額森聚集賊衆畱住斷頭山一帶駐劄勅至爾等即將岷洮等衛土兵及延綏官軍量宜調到爾處操練伺候進攻毋失機會欽此

欽遵會同鎮守太監來福等計議照依勅內事理將郎中汪濬檢校何英原選土兵官軍舍人餘丁土民人等調取連馬匹軍器什物各兼程倍道定限赴寧夏操練聽調河州等衛又稱切近番人恐番衆乘虛攻劫缺少戰守申乞定奪等因爲照係是奉勅調取土兵官軍及係寧夏總兵官處置事理未敢定奪回報臣等查得正統十四年十月內爲因達勒侵犯京師蒙差戶部郎中汪濬都察院檢校何英賚勅馳驛前來河州西寧洮州

鞏昌秦州平涼岷州臨洮等八衛廣集驍勇精壯官軍  
舍人餘丁土軍土民及諸色人等限十一月中到京  
殺後各官延至十一月終方到止將各衛存留見在操  
備守城屯田軍餘原召募民壯義勇不問老弱輶數各  
官新集之數十無一二又出榜召商中納鹽馬不問好  
歹輒便收受印烙給軍騎操起程間景泰元年正月內  
又因番人犯邊勅汪許何英將所集河州等八衛人馬  
不拘番漢土民等項共輶一萬率領前去寧夏操練聽

調務在兵精馬肥何英率領河州西寧岷州洮州人馬已到寧夏汪濬率領臨洮鞏昌秦州平涼人馬內臨洮鞏昌人馬行至中途又因西寧等衛奏稱缺人守備本處城池將各衛人馬發回操備緣各衛到寧夏路程寫遠往回之間遠者五千餘里近者三四千里以致人馬疲困內馬匹死傷數多今都督同知張泰等不照見奉勅內事理將洮岷等衛土兵量宜調取操練却將原轄數守城屯操官軍舍餘并召募民壯義勇一槩調取若

使人馬再到寧夏不無愈加疲困死傷豈能進攻委的  
徒勞人力虛費糧料不能濟事及延綏官軍雖近寧夏  
緣地方廣闊寨堡數多即日常報聲息急用人馬隄備  
再照寧夏今春敵人深入分散搶掠直到城下敵衆不  
過十七八人寧夏官軍閉門不出竝無一將一軍敢發  
一矢與敵後敵人遠出城門猶且關閉日久不開軍民  
怨嗟似此畏縮無謀若使發兵進攻必致失機悞事况  
敵情譎詐居止無常朝更夕移難以料測伏乞聖斷合

無罷進攻之議設守禦之方將延綏各寨堡及岷洮等  
八衛官軍暫且停調候九月秋成官軍甦息馬匹肥壯  
寧夏果有聲息不爲常例於岷洮等衛每衛揀選精兵  
或四五百員名或三四百員名赴彼添助備禦候來年  
春暖河開邊境少寧放回操守遇警再調庶使邊務不  
誤人情獲安具題該本部官欽奉聖旨兵部看計議來  
說欽此又該鎮守內官王莊兒等亦題前事通抄到部  
查得先該監生練綱奏要差人往陝西土番等處徵兵



刻期入援等因會議得練綱所言係禦敵急務合無准  
言通行請勅差官整理等因正統十四年十月十五日  
節該奏奉欽依便寫勅差官徵召土番壯兵來京策應  
欽此欽遵請勅差戶部郎中汪濬都察院檢校何英賈  
去選取續該寧夏總兵官都督同知張泰等題景泰元  
年正月日期不等節有達勒犯邊搶掠人畜要添調官  
軍併力破敵等因會議得汪濬等原調土番先已奉勅  
令在寧夏操備未審曾無到彼合無請勅汪濬等查勘

前項土番若是已到寧夏就聽張泰等調度殺敵若是中途未到就便相機進止或就所止去處操練聽候或取便道兼程前進務在斟酌得宜不許畏縮誤事具題奉聖旨是欽此欽遵又該鎮守西寧都指揮僉事汪清鎮守內官保壽俱奏稱缺軍守備要將檢校何英原選到西寧驍勇官軍人等存畱在衛以安邊境等因本部爲照前項官軍雖令汪許何英等統領策應寧夏未審即今曾無到彼及照即日黃河凍開敵人漸退合無仍

令汪許何英率領新起土軍在寧夏總兵官張泰等處操練惟復發回原衛所令彼處鎮守等官提督操守城池聽候調用將汪許何英取回本部官題奉聖旨是著回衛所操守城池汪許何英取回欽此欽遵又該寧夏總兵官都督張泰等題節該欽奉勅近得番中走回人口說稱額森聚集番衆待草飽時往大路搶劫其老營畱在斷頭山一帶駐劄至爾等即便從長計議停當或將岷洮等衛土兵及延綏官軍量宜調到爾處操練

聽候爾等即先差夜不收出口四散哨探如敵老營在彼空虛勢有可襲即便量率輕騎或乘夜劫營或倍道進攻務在相機審勢計出萬全欽此欽遵會議得岷州等八衛土兵乞令原選郎中汪濬檢校何英星馳前去岷洮等處將原選土兵一萬員名內挑選精壯者八千員名每二人馬三匹星夜前來寧夏聽調出境等因具題本部議得汪濬等新起土軍已令回還原衛守禦城池今又重複起調前去寧夏聽調出境殺敵非惟原衛

城池空虛抑且土人不堪勞擾因而激變重爲邊患况汪許等又係欽取回京官員合行張泰等會同太監來福僉都御史韓福等從長再議哨探達勒老營是否長在斷頭山應否調前項土軍人等去彼劫營中間有無窒礙明白回奏定奪本官題奉聖旨是欽此欽遵今照興安侯徐亨同副都御史劉廣衡及巡按監察御史陝西都布按三司內官王莊兒等俱奏敵情譎詐居止無常朝更夕移難以料測乞罷進攻之議設守禦之方將

延綏各寨堡及岷洮等八衛官軍暫且停調候九月秋  
成官軍甦息馬匹肥壯遇警再調一節切詳敵人額森  
等委的變詐多端况番人隨水草以爲居止其鄂囉巢  
穴未必常在斷頭山屯駐况近日彼中走回男子高全  
等說稱這達靼人馬車輛俱在貓兒莊駐劄要於本年  
三月二十一日大勢都來攻圍大同等因當此盛暑之  
時彼無定居之處若令寧夏總兵官張泰等必欲出兵  
往斷頭山襲擊額森老營不惟出無所得虛勞士馬抑

恐深入彼地別有疎虞又况延綏等處官軍近該都督同知王禎等奏畱本處守禦城池并策應山西河南等處殺敵難以調去寧夏等處今若止將寧夏見有官軍令張泰等統領出境誠爲不可合無將寧夏原議出境官軍照依興安侯等官徐亨等所奏暫且停止其延綏岷洮等處官軍俱各不必起去寧夏令其自守地方以後若有機會可以乘虛襲敵另行計議方略具奏庶可固邊城而有大利休士馬而免疎虞及照徐亨等奏稱

汪許何英先前勅限十一月中到京殺敵後各官延至十一月終方到止將各衛存畱見在操備守城軍餘及原選屯軍召募民壯義勇不問老弱輶數各官新集之數十無一二又出榜召商中納鹽馬不問好歹輒便收受印烙給軍騎操等因顯是汪許何英俱係陝西土人假以選軍中馬爲由在鄉延住恣意妄爲徇私作弊以致軍士馬匹俱爲虛文京師寧夏兩不策應及至欽取回京延今五箇月不到似此挾詐營私方命誤事法難



容恕今徐亨等既以奏發合無行移法司給批差人馳  
驛前去沿途直抵汪許何英原籍挨提各官赴京問擬  
明白奏請發落再照徐亨等奏稱寧夏今春番人深入  
分散搶掠直至城下敵衆不過十七八人寧夏官軍閉  
門不出竝無一將一軍敢發一矢與敵後番人遁去城  
門尚猶關閉日久不開軍民怨嗟一節顯是寧夏總兵  
叅將等官都督同知張泰等并叅贊軍務僉都御史韓  
福無勇無謀推奸畏縮以致外番得以深入軍民被其

忠害亦合問罪但各官俱係守邊大臣即今邊境累報  
聲息緊要用人合無請勅切責張泰丁信王榮韓福熊  
震等令其整飭人馬固守地方今後遇有敵人犯邊務  
要相機督率官軍乘虛襲殺建功以贖前罪不許似前  
退縮談事如違定行叅奏拏問治以重罪緣汪潁何英  
係京官及奉欽依兵部看計議來說事理具題景泰元  
年五月二十九日奉聖旨是汪潁何英都察院出批錦  
衣衛差人鋪馬裹去挨拏來問其餘都准擬欽此

兵部爲軍務事照得近該宣府等處并紫荆關總兵守備官員節奏達鞑糾集人衆意圖深入爲寇等因言雖未可憑信事亦不可不備及照京師官軍已經議奏分定京城九門列營操練設若外兵來京侵擾臣等仰遵聖算罄竭愚衷當鼓舞大衆士卒相機戰守必不至出彼之下京師可保無虞但以涿鹿保定真定易州一帶城池外則接連關口內則切近都城恐外兵深入覘知京城有備不敢侵犯即時分投剽掠各處城池不無腹

裏人民被其驚擾縱使京師調軍前去截殺又恐道途  
寫遠士馬疲勞一時追逐不及緩急難於濟事查得涿  
州除原有涿鹿等三衛官軍舍餘外又差都指揮陳旺  
沈奐率領在京官軍共七千五百員名保定除原有大  
寧都司保定左右中前後五衛官軍舍餘外又差都指  
揮石端等率領在京官軍共七千員名真定除真定神  
武右二衛原有官軍舍餘外又差都指揮王信張智率  
領在京官軍三千七百員名易州除調茂山衛全伍官

軍舍餘外又差都指揮王虹率領在京官軍六千五百員名俱各前去修守城池應援內外又有總兵官都督同知劉安右僉都御史曹泰統領在京各營精銳馬隊官軍五千員名往來巡守各城各關今議得雖有前項官軍在於各營操守然恐各官因見分定地方遇警不能相機策應雖有總兵官劉安等巡守官軍又恐地方廣濶倉卒不能周遍臨期因而誤事未便合無再於在京五軍營撥精銳馬隊官軍四千員名神機營撥馬隊

神銃官軍一千員名共五千員名請勅右都督楊俊充  
遊擊將軍率領前項官軍并口外原跟隨本營慣熟頭  
目人等前去涿州保定真定滄州河間等府州地方往  
來巡哨遇有達靼去處聽楊俊節制出軍截殺不許退  
避輕易縱其剽掠其總兵官都督同知劉安叅將都指  
揮僉事魏忠顏彰令策應易州并白洋紫荆倒馬等一  
帶關口守備官軍相機進勦若有機會可以與楊俊會  
合亦要同心協力以圖成功不許自相矛盾因而愆事

其合用行糧草料行移戶部差官預先整理如此庶內  
外得以應援而敵騎不敢深入緩急得以相濟而人民  
有所倚仗具題景泰元年六月二十四日奉聖旨是欽  
此

兵部題爲軍務事照得山西地方外則接連邊境內則  
屏蔽京師先因達靼入寇人民被其搶掠近該鎮守山  
西右侍郎等官張敏節奏忻州等處地方又有達靼入  
境剽掠查得山西除偏頭鴈門二關并隣邊振武振西

等衛原有官軍守備其腹裏軍衛有司俱各城池空虛  
官軍數少雖有勅命署都督僉事王良右副都御史羅  
通前去鎮守緣無官軍可調遇警卒難措置萬一敵兵  
深入平陽等府地方爲患非惟居民被其荼毒抑恐中  
原因而不安今看得都指揮石彪驍勇有謀曾經戰陣  
先充遊擊將軍在於大同并代州等處巡哨節次劫殺  
敵兵有功合無將石彪量與陞擢於五軍營選撥精壯  
馬隊官軍二千員名神機馬隊神銃官軍一千員名請



勅令石彪充遊擊將軍統領前項官軍前去山西太原等府地方往來巡哨其本部原奏差監察御史等官起調延安綏德官軍四千員名暫於平陽府駐劄偏頭關官軍三千員名暫於太原府駐劄與各城應有操守官軍民壯義勇俱聽石彪公同王良羅通提督遇有敵兵深入就令本官統領出奇截殺其所在鎮守等官不許占留不發及忌嫉功能以沮大計有功重加陞賞誤事罪有所歸仍行守備偏頭關都督同知杜忠左叅議葉

清守備鴈門關都指揮同知翁信右副都御史朱鑑如是探有敵勢虛弱機會可乘亦要期約石彪等同心合力調度官軍互相襲擊毋得自相矛盾因而僨事自取重罪緣係請勅差遣官軍隄備敵人事理具題景泰元年六月二十四日奉聖旨是石彪陞都指揮同知署都督僉事著充遊擊將軍欽此

兵部爲軍務事先該本部照得易州涿州保定真定通州俱爲京師屏蔽緊關要衝合當增兵操守以爲應援

已經議擬奏准於五軍營撥馬步官軍二萬員名易州涿州保定各五千真定三千通州二千令署都指揮僉事陳旺等五員管領前去各城操練如遇各關或京師有警就便策應及請勅都督同知劉安充總兵官右僉都御史曹泰叅贊軍務五軍等營撥精銳官軍五千員名隨同劉安等於前項地方關口內外往來巡守及勅都指揮僉事魏忠顏彪分巡東西二路關口遇警相機調度去後今照口外宣府懷來并山西蔚州等處節報

達輶大舉入寇聲息緊急紫荊白羊等關口守備官員亦奏番兵切近關隘等因臣切詳各關委係京師屏蔽緊關衝要去處若是番兵深入爲寇必先攻犯關口誠不可不上緊隄備查得各關除原有官軍外節次在京撥去官軍紫荊關共一萬二千餘員名倒馬關五千二百餘員名白羊口共五千八百員名然中間軍士爲因衣鞋破損過活艱難逃竄數多雖是設法挨拏倉卒未能盡獲陸續撥補即今尚未完足及照涿州原操官軍係

是策應白羊口易州保定原操官軍係策應紫荆關真  
定原操官軍係策應倒馬關各處雖是相去不遠倉卒  
難於調度欲將前項操守涿州等項官軍計議量撥各  
關守備緣係邊務難以遙制合無請勅都督同知劉安  
右僉都御史曹泰及操守涿州署都指揮僉事陳旺易  
州都指揮僉事劉全保定都指揮同知石端真定署都  
指揮僉事張智公同各處鎮守文武官員計議將在京  
原撥去操守官軍照依地方應合那調若干前去各關

兼同本關官軍守備或團營操練聽候殺敵或各關原有官軍堪勾修守不必添調其陳旺等所領官軍依舊於各城操守遇有緊急邊情及砲火聲息就便相機統領前去各關策應殺敵二者之間何者爲當量宜處置通行具由呈馳會奏以憑定奪務在城池關口俱不失誤腹裏境外兩無疎虞不許視常輕易偏執占愆及自求安逸避遠就近以致守備不固遇警誤事罪有所歸緣係請勅處置邊關事理具題景泰元年六月二十四

日奉聖旨是欽此

兵部爲邊務事內府抄出鎮守宣府等處內官監右少  
監栢玉題照得宣府地臨極邊控制北陲之要害實爲  
京畿之藩籬向者番人入剽尚賴朝廷洪福城池堅固  
士卒効力僅保無虞邇來酋長額森累遣其類講和奉  
送太上皇帝回京緣彼尚猖獗其情難測誠恐指以和  
好爲由因而窺伺虛實不可不預爲隄防然自去年番  
人侵犯京師蒙調總兵官昌平侯楊洪率領精銳官軍

五千餘員名前去截殺事寧就畱本官在京及存畱馬步官軍都指揮梁泰等三千餘員名跟隨守備緣前項官軍原係備邊人數况兼遺棄家小經年在外衣鞋破損盤纏罄乏無人供送委的艱難臣會同總兵官都督朱謙等議得先因達靼分投入剽圍困各城除將宣府原操馬步神銃官軍量數發回萬全左右懷安蔚州廣昌等衛所固守城池外今查得見操馬隊官軍有馬者四千六百八十三員名無馬者二千九百六十二員名



步隊官軍四千八百五十員名神銃手一千六百三十  
九員名共有一萬四千一百三十四員名實是人少地  
廣衛所隔越調用不敷即目秋高馬肥恐彼侵犯難以  
抵敵乞勅廷臣從長計議將前項存畱在京官軍仍發  
本處俾依家小住過操備養其銳氣敵至相機勦殺庶  
爲便益具題該本部官欽奉聖旨兵部知道欽此又該  
總兵官左都督朱謙亦題前事通抄到部查得先該昌  
平侯楊洪奏准存畱口北開平等衛官軍指揮梁泰等

三千餘員名在京隨操聽候警急調用續該總兵官左都督朱謙內官栢玉等奏要將梁泰等官軍盡數發回本部節經議擬京師天下根本即今番人雖已請和奸詐難測不可不增兵防備又經奏准暫畱在京候邊情虛實何如另行計議發回近該本部照得獨石等處城池屯堡先因番兵侵擾因而失守倉庫糧儲等項俱各見存緣此等城堡俱係緊關去處控制邊境關係非輕敵人今已請和久經奏准請勅總兵官左都督朱謙會

同鎮守巡撫叅將等官計議修設守備并沿邊一帶墩臺屯堡俱要設法修築以備哨守如果事體重大應合奏請明白上聞去後今奏前因叅照官軍梁泰等三千餘員名原係口外守備人數合當發回原處以備守戰及照口外獨石馬營龍門長安嶺等處城池俱係緊關要害去處外控朔漠內蔽京師去年因番衆入寇勢孤援寡俱各捐棄失守茲當聲息稍寧之時可以措置之日若不從長設法作急區畫停當萬一彼或渝盟未免

似前誤事雖經具奏令朱謙會議修設守備誠恐各官  
互相矛盾遷延月久不即整理有妨邊備看得昌平侯  
楊洪都指揮同知楊能先在口外年久備諳彼處山川  
險易道里遠近士馬強弱邊情緩急合無請勅楊洪或  
楊能令其帶領原畱在京官軍三千餘員名前去宣府  
與同總兵官都督朱謙內官栢玉及叅將鎮守等官侍  
郎劉璉僉都御史任寧并巡按監察御史萬全都司堂  
上官公同計議獨石馬營等處城池及龍門長安嶺一

帶墩臺隘口若何設法守備每城堡合用官軍若干其各處城堡或照舊修設或相度併立或止用原有官軍協濟操守務在用心協謀逐一勘議允當經久利便就便急忙用工應修理者趁時修理應設立者上緊設立俾聲勢得以連絡彼此互爲應援仍將原帶官軍梁泰等三千餘員名分派各城守備以實邊境通將處置過緣由具實回奏令差去官員回京以後若有地方疎虞罪坐差去之人緣係欽依兵部知道事理具題景泰元

年八月二十八日奉聖旨是欽此

兵部爲軍務事照得近該鎮守山西內官懷忠副都御史羅通署都督僉事王良并守備偏頭關都督同知杜忠鎮守鴈門關副都御史朱鑑等節奏景泰元年七月以來日期不等節有達靛或百十餘人或千餘人到於山西腹裏保德等州河曲等縣殺掠人畜等因通行隄備外今訪得番中走回人口并山西奏事人員說稱前項達靛不是額森部下人數係烏梁海部下約有三千

餘人一向在於櫃子山屯駐四散出沒剽掠因無官軍截殺所以益肆猖獗今照山西見有遊擊將軍署都督僉事石彪率領馬隊官軍三千五百員名在於太原府又調到延綏官軍四千員名在於平陽府操守偏頭關官軍三千員名在於太原府操守俱係久在邊方慣戰人數其山西都司所屬衛所及偏頭鴈門二關并境外大同威遠渾源懷仁朔州等處各有守備官軍若不從長設法調度官軍將前項達靼早爲截殺即目山西太

原府州縣人民已是被其虜掠驚疑逃竄數多慮恐此  
番因來腹裏搶劫得慣熟知道途險易遠近往來得肆  
侵掠非惟大同糧草難以備運接濟抑恐中原人民不  
得安生合無各另請勅王良羅通石彪同偏頭鴈門二  
關守備都督同知杜忠都指揮同知翁信副都御史朱  
鑑左叅議葉清及大同總兵官定襄伯郭登叅謀軍事  
左都御史沈固鎮守太監陳公并鎮守大同西路右叅  
將都督許貴及巡按山西監察御史都布按三司堂上



官從長會議量度前敵實有若干的於何處駐劄或用  
官軍若干合當分爲幾路何者爲正兵出戰何者爲奇  
兵掩襲何人分擾其前何人邀截其後何處係此敵出  
沒要害去處用兵若干拒截何處係敵營寨所在用兵  
若干圍困逐一區畫停當務在先勝後戰就令石彪統  
領各項官軍并各城民壯人等或令羅通提督王良等  
隨後策應翁信杜忠各出精兵夾擊或許貴等量調士  
馬按伏邀拒務在同心協力計出萬全作急勦殺以圖

成功不許自分彼此互相推調因而玩敵重貽邊患其合用馬匹軍資器械宜從羅通石彪王良杜忠郭登等隨宜措備啓行仍將調兵方略先行差人星馳具奏有功重加陞賞誤事罪有所歸緣係會議調兵勦殺伏兵事理具題奉聖旨兵部同石亨楊洪柳溥看了上緊來說欽此欽遵通抄到部會同各官計議內安遠侯柳溥說稱鎮守廣西年久迤北等處地方城池等情俱不知識不敢妄言及武清侯石亨昌平侯楊洪各將邊境

合行事宜寫出中間有不可行者有窒礙者另立前件  
于後今議得大同宣府地方自敵人犯邊以來官軍消  
耗數少沿邊墩臺壕塹俱被敵坍塌無人瞭望致使出  
入自由縱橫剽掠以致城門終日緊閉不敢放出樵採  
頭畜餓死房屋拆盡田禾不得收割草束俱被焚燒况  
今春農在邇若不設法掃蕩伏莽人心委的不安合無  
請勅石亨楊洪各帶精銳馬步官軍四萬員名內步軍  
三萬五千馬軍五千石亨自紫荆關往大同楊洪自居

庸關往宣府沿途巡哨就行提督守備官軍人等堵塞  
關口修理牆柵墩堡及布列營陣暗設隄備其若勢大  
來攻以計破之如其勢小以兵勦之逐之遠去依舊瞭  
守遮護彼處軍餘人等耕種秋成一體撥軍防守戶部  
委官措備糧草供給軍餉候布置停當事體寧帖仍舊  
回京其餘計議未盡事件宜從各官臨時處置務在區  
畫得宜經久利便上足以鞏固京師下足以控制邊境  
今將各官寫出邊境事宜議擬開立前件開坐具題景

泰元年八月二十八日於奉天門節該奉聖旨領軍巡  
哨及措置邊務都准議行但京城守備尤重恁每還自  
從長計議石亨楊洪柳溥內推一員足以付託的來看  
欽此

兵部爲邊備事兵科抄出鎮朔將軍總兵官後軍都督  
府左都督朱謙等題欽奉勅鎮守宣府右少監栢玉總  
兵官左都督朱謙叅將都督同知紀廣侍郎劉璉僉都  
御史任寧獨石等處城池屯堡俱係緊要控制邊境去

處所繫非輕先因外兵侵擾因而失守其倉庫糧儲等項俱各見存即目邊境稍寧不可不趁時修理勅至爾等即便從長計議設法修理整治照舊守備其沿邊一帶墩臺屯堡亦須修築以備操守如果事體重大應奏請者明白奏來處置務在從宜區畫以圖經久不許因循怠忽有誤邊務欽此欽遵照得獨石開平衛等城堡原有調撥宣府前等衛所官軍在彼守備先因外兵侵犯將各城堡拋棄臣等會同柏玉劉璉任寧巡按御史

張昊議得前項城堡官軍彼時被敵殺虜驚散逃故者  
多欲便照依舊數撥軍守備緣宣府等處被其搶虜及  
逃遁者亦多况宣府係是總鎮去處合當聚集軍馬團  
操以備併力剿殺其萬全左右懷來俱係極邊軍馬數  
少若再摘撥前去倘遇敵至難以戰守乞勅廷臣從長  
計議合無於獨石除見有官軍二千五百員名合於在  
京官軍添撥一千五百員名馬營堡除見有官軍二百  
七十五員名合於在京添撥一千員名雲州堡除見有

官軍一千二百八十員名合於在京撥添一千員名赤  
城堡除見有官軍四百八十員名合於在京添撥一千  
員名龍門衛除見有官軍一千二百八十一員名合於  
在京添撥一千五百員名龍門千戶所除見有官軍一  
千九百九員名合於在京添撥一千員名長安嶺除見  
有官軍二百九十六員名合於在京添撥一千員名每  
處揀選智謀驍勇都指揮一員提督仍推選叅將一員  
總理公正老成文職一員贊助務在戰守合宜撫綏有



道敵至則相機剿殺平時則蓄威養銳如此則邊疆復振而人民安妥矣緣係欽奉勅旨區畫經久事理具題又該朱謙等亦題前事通抄到部案照先准本府咨該昌平侯楊洪言懷來相去宣府一百五十里原有土木雞鳴山二驛官軍走遞近因達靼侵犯俱被驚散凡有聲息往來飛報猝難相通見得土木西北雷家店西離宣府八十里至懷來七十里北接麻峪口外通板峪峪等處亦係達靼出沒之處路當衝要合築城一座將保

安衛并美峪千戶所官軍安插在彼守備便益等因已  
經會議委官踏勘量計丈尺合用人工議將宣府前衛  
所除存畱守城官軍外於內并操備步隊內亦撥五千  
名共二萬名相兼修築彼時爲因聲息緊急不曾興工  
今會同栢玉劉璉任寧張昊議得即今聲息稍寧欲要  
修築緣楊能等軍馬已調回京况宣府迤西萬全左右  
懷來保安等四衛城堡俱臨極邊控制衝要除將原轄  
築城步隊并無馬旗軍二千六百六十名退回各守城

池外各用工程浩大委的人力不敷乞勅該部調遣官  
軍一萬五千名宣府各衛摘撥軍餘一萬五千名共轄  
三萬名內一萬名各帶軍器防護二萬名做工庶得城  
池易完事不失誤等因具題該本部官奉聖旨兵部知  
道欽此欽遵查得先該內官栢玉左都督朱謙等各奏  
要將昌平侯楊洪奏畱在京口外開平等衛官軍都指  
揮梁泰等三千員名仍回原衛所操守本部爲照前項  
官軍原係口外守備之數合當發回守戰及口外獨石

馬營龍門長安嶺等處城池先因勢孤援寡俱各捐棄失守茲當聲息稍緩合當設法措置合無令昌平侯楊洪或都指揮楊能帶領梁泰等官軍前去宣府與同朱謙等計議將各該城堡修設守備題奉聖旨冬天時月口外水土早凍人受寒苦事不能成且罷待明年春暖再來說欽此本部又照栢玉等奏討梁泰等官軍合無先行發回宣府等處操守惟復待春暖一發前去奉聖旨待春暖一發整理欽此欽遵今朱謙等奏要添撥在

京官軍前去獨石等處守備各選都指揮一員贊助及  
於雷家店築立城堡一節緣在京原操官軍數內但係  
江南衛所運糧者俱已放回其餘又調各關修守遊擊  
等項見在官軍委實數少京師天下根本外兵變詐難  
測今雖朝貢請和不可不嚴隄備所據見操官軍難便  
輕易掣動及照朱謙等先奉勅計議邊務別不曾出一  
計策動一官軍修一墩堡設一防守又不開奏彼處原  
先捐棄城堡即今樓櫓倉庫廢存若何及沿邊一帶墩

臺何處可以修復何處可以用工其見在糧儲應否搬運止是奏要撥添官軍前去似此徒具文移豈不有誤邊務況今日之事邊備爲重苟修一城堡則有一城堡守戰之益築一墩臺則有一墩臺瞭望之便合無差人馳驛齎文與朱謙公同鎮守叅將等官內官栢玉侍郎劉璉僉都御史任寧叅將紀廣等計議雷家店等處城堡若可以用工修築作何調度見有官軍人等上緊逐漸修築仍撥精銳官軍嚴加防護不許仍前怠忽致有

疎虞其文職宣府已有劉璉任寧在彼叅贊又有紀廣  
若再推舉添差不無官多徒爲煩擾難以准理合用都  
指揮領軍分投各城守備宜從量調見有官軍於萬全  
都司見任都指揮內差委驍勇有謀者管領前去務在  
揀選至公不許徇私濫用仍將計議處置過邊務緣由  
可行可止逐一從實開奏以憑定奪毋專以添軍爲由  
展轉延調如若遷延苟且日後誤事罪有所歸緣節奉  
欽依兵部知道事理具題景泰元年九月初八日奉聖

旨是欽此

兵部爲邊務事照得寧夏地方切近邊外近該彼處總兵叅將等官節奏有達靼侵犯地方殺掠人畜等因除通行隄備截殺外臣等竊聞邊方者京師之藩籬將帥者士卒之司命必得將帥謀勇兼全然後邊方保無疎失今訪得寧夏總兵官都督同知張泰雖稱頗知軍旅殊少勇敢守則有餘戰則不足及節次番中走回人口俱稱達靼每言進馬使臣若賞賜的輕先去搶了陝西



等語若不早爲處置萬一番箇也先等渝盟逞奸糾衆  
侵擾陝西地方寧夏實當其衝誠恐總兵官畏怯不肯  
領兵出戰縱令深入腹裏則關陝一帶俱不得寧利害  
所繫不爲不重詢訪得陝西都司都指揮使馬讓驍勇  
便捷堪爲戰將合無將本官量陞都督僉事請勅充副  
總兵令去寧夏協同總兵官都督同知張泰鎮守地方  
遇有外兵侵犯務要設法調度身先士卒相機截殺有  
功陞賞不怯不許畏縮怠忽互相推調縱敵爲害仍各

另請勅張泰太監來福叅贊軍務右僉都御史韓福佐  
理軍務都指揮使熊震各要彼此協心與馬讓公同體  
量邊情共濟戎務以爲邊方保障毋得互相矛盾忌嫉  
功能彼此忿爭墮廢機務自取重罪緣係選用邊將及  
請勅事理具題景泰元年十二月初四日奉聖旨是欽  
此

兵部爲邊計事禮科抄出禮部尚書楊寧題正統十四  
年八月達靼犯邊獨石龍門一帶及永寧懷來邊將皆

棄城不守以致數十年之經營數十萬之蓄積一切委諸草莽罪不容誅事往難論比聞欲調官軍復守獨石龍門等處斯固攸宜臣切維爲政當理內及外守邊當自近及遠京師者四方之本永寧懷來宣府直抵大同皆京師藩籬也各處見在軍馬以之專守尚慮未足爲固而又分之以守獨石等處則兵愈寡而勢愈弱一旦邊報卒至救援不及切恐人心惶惶事如前日未可知也獨石等處一搖則永寧諸處人心必不自安誠不可

不慮又況足食而後足兵今宣府大同皆告缺糧以近邊猶爾又安能遠供餽也今之計邊儲者或曰軍運或曰民運或曰納粟冠帶或曰開種鹽糧或曰銀貨雜買言者紛紛而皆不求其本夫有播而後有穫春耕而後秋歛奈之何不務其本而惟末之圖古人屯金城屯渭濱屯塞下具有成法實邊之道無以逾此往者不可諫來者猶可追雖不可養患亦不可無事為啟釁來則禦之去則備之法之良也不賞邊功以沮外徼生事之人

意之善也今之爲邊將者士卒不恤而一意希求陞賞  
外侮不禦而一槩妄報功次有斬獲一二首級而報功  
至一二百人者有止稱殺敗邊人斬獲首級而全不開  
數者其爲欺妄不言可知此果何功於朝廷何益於邊  
備至如臨陣亡死者固皆可愍然軍勝而死此勇進而  
至喪生其忠可奇軍敗而死此退走而被追殺正當論  
主將之罪今一槩陞一級是死者以退走爲功而生者  
不以敗亡爲懼又非所以示勸懲也臣愚以爲永寧懷

來宣府直抵大同京師藩籬當益兵積糧選將固守彼固則此自安獨石龍門等處姑候此有餘力然後議及遺下糧米設法以近就近搬運給軍衛接待新來和好必不即爲邊患一帶田地可以趁時設法屯種令各該總兵叅將等官及侍郎劉璉都御史沈固任寧并巡按御史分投委官提督親行勸課如是田多軍少先儘軍種遺下餘田聽令近邊官豪勢要一應人等有力之家儘力開種無種子者官爲借給秋成抵斗還官明行榜示

景泰二年子粒并地畝稅糧俱免徵納所得花利令自  
糶賣仍行納粟冠帶開中鹽糧銀貨糶買等法人人見  
利而趨則耕者不勸而勤得穀必倍可資邊儲北直隸  
山東山西河南近邊去處宜令各衛所府州縣官專委  
一員提督春農布種仍與設法置買牛具種子俱從巡  
按御史管屯僉事比較其有用心勤得穀多者指實具  
奏量加褒賞以勸其餘則家給人足可資供餽沿邊守  
將遇有聲息且須預將在外人畜收入城堡嬰城固守

俟師老氣惰然後乘便擊之如彼肆無忌憚越關內侵則內外合兵令其腹背受敵計無不克有功官軍陞賞以信如有似前棄城不守率衆在逃無分貴賤不限親疎必殺不宥然後人知勸懲其有斬首少而報功多及妄報殺敗外兵斬獲首級希求陞賞者合無其功皆不必錄軍勝陣亡官軍與軍敗失陷者陞賞亦須量有節減以止貪冒以戒退怯庶得爵賞不濫臣誠愚昧仰蒙聖恩莫能補報比因議及邊事不得長策晝夜思惟寢



食不安輒有所見不敢緘默倘有一得可采乞勅該部施行緣係邊計具題奉聖旨戶部兵部看計議來說欽此欽遵抄出到部除屯種等項戶部另行外查得先該本部照得獨石龍門長安嶺等處俱係萬全都司所屬緊關城池去年敵衆深入俱各捐棄失守茲當聲息稍寧可以措置雖經具奏令總兵等官朱謙等修設整理誠恐各官遷延有妨邊備已經節次議擬奏准令都督僉事董斌提督前項衛所官軍修理城池防護糧儲等

項及昌平侯楊洪原畱在京開平龍門等衛官軍三千員名并其餘俱係口外衛分在京報効等項官軍俱令都指揮楊能盡數領回原衛所操守近該董斌題稱獨石馬營雲州鵬鶚長安嶺等處城池委係外控異境內庇宣府懷來一帶若獨石馬營等處城守嚴固則腹裏衛所自然無虞今議將前項城池重復整飭修設屯營誠安邊禦侮長策合設都指揮一員在彼分守地方請降勅書并給符驗及將獨石等處衛所官軍男婦人等

俱要聽伊鈐束督發原處以實空虛之城并將萬全都司帶俸都指揮推選有謀有勇之人分派獨石馬營李家莊鵬鶚龍門等城專一守備操練聽伊調遣等因具題抄出本部又經逐一依擬奏准通行去後今尚書楊寧奏要將獨石龍門等處候有餘力然後議及一節臣等切詳各處土地城池俱係祖宗經營創建其獨石龍門一帶正係極臨異境緊要去處外爲邊境之藩籬內爲京師之屏蔽去年番人糾衆入寇守臣慮恐勢孤援

寡因而捐棄失守至今清議不容今額森等已來請和  
邊報不甚緊急所宜興滯補敝修設故疆以爲久遠之  
計以圖復讐之舉況前項城堡已命董斌提督并原守  
各城軍馬俱已發回即目正在營置之際彼處總兵鎮  
守等官竝不曾奏難以修復緣由豈可自餒自畫輕易  
擲棄且我退一尺則彼進一尺我失一寸則彼得一寸  
得失進退之機安危治亂所繫就使干戈擾攘之日尚  
當固守封疆況平居無事之時不宜自感土地兼且守

備各城自用原有軍馬而非那移他處官軍今以理執  
論之必當復修整理合無通行請勅宣府總兵叅將鎮  
守叅贊巡撫官員撫寧伯朱謙右都督紀廣內官栢玉  
侍郎劉璉僉都御史任寧都督僉事董斌等將獨石馬  
營赤城雲州李家莊鵬鶚龍門長安嶺等處一帶邊務  
查照本部節次議奏事理會同計議區處斟酌人情之  
勞逸相看地形之夷險先其急而後其緩舉其大而略  
其小果係緊關去處上緊修復不係緊關去處從緩整

理其各城合用都指揮務在惟選至公俾邊城守備得人而糧儲防護有法不許各持己見怠忽因循自餒其志廢弛兵備若因此失誤事機必治以重罪不恕其奏永寧懷來宣府直抵大同當益兵選將固守緣永寧懷來已有都指揮同知楊信萬全右衛已有都督僉事江福提督宣府已有總兵官撫寧伯朱謙叅將右都督紀廣大同已有總兵官定襄伯郭登叅將都指揮潘興東路已有叅將右都督方善西路已有叅將都督同知許

貴宣府大同所屬前項各城除總兵叅將及把總提督  
守備官軍外又有都指揮或一二員或三四員守城管  
操而所在衛所官軍止勾固守別無相應官軍可以增  
添其奏有功官軍陞賞以信如有似前棄城不守率衆  
在逃無分貴賤親疎必殺不宥其有斬首少而報功多  
及妄報殺敗外兵斬獲首級希求陞賞其功皆不必錄  
軍勝陣亡官軍與軍敗失陷者陞賞亦須節減一節臣  
竊惟兵之勝負固係乎賞罰而賞罰運用必在乎嚴明

近年以來因南北交訐紛擾所在用兵撫捕其有功官軍中間若有不明者本部議擬行令所在提督叅贊軍務等項都御史及監察御史等官重複體勘明白方纔定奪陞賞而總兵叅佐等官若有失機誤事亦往往覆奏降黜如向者所陞德勝等門紫荆關及大同宣府等處官軍俱係殺敗外兵保全城池有功人數該總兵等官造冊奏要陞賞節行駁勘明白若不照例陞用何以激勸人心其有退縮覆潰如陽和口及土木等處官軍



雖已死於鋒鏑未嘗陞用一人况兵家之事以捷勝破敵爲全功不以斬首多寡爲勲績若止以斬首多寡定爲陞賞崇卑則人皆顧戀首級未免爲敵所制今稱有妄報殺敗外兵斬獲首級希求陞賞緣無指實無憑查究合無通行各處總兵鎮守叅贊等項文武大臣今後若是奏報破敵有功官軍務要體勘明白要見何人奮勇當先爲首何人協力跟隨爲從何人生擒外兵何人斬獲首級從實開奏以憑定奪不許徇私泛濫將無功

之人一槩冒請陞授以致賞罰不明士氣消沮如違一體治罪及奏沿邊遇有聲息預將人畜收入城堡固守俟其師老氣惰然後擊之如彼越關內侵則內外合兵令其腹背受敵等情俱係用兵常法亦係見行事理別無定奪緣節該奉欽依兵部看計議來說事理具題景泰元年十二月初八日奉聖旨是獨石龍門一帶乃宣府藩籬若棄城不守宣府必孤京師以何禦敵寫勅與朱謙董斌每上緊修守不許因循誤事欽此

兵部爲走回人口事內府抄出鎮守宣府等處內官監  
右少監栢玉題景泰二年五月十四日准提督獨石馬  
營等處都督僉事董斌手本本年五月十二日哨探馬  
營夜不收百戶李長目兒等送到番中走回婦女郭四  
女供係易州涑水縣民人郭義女正統十四年八月內  
被達韃搶去近日達韃連家小牛羊馬匹盡往南行一  
箇月纔到兩路牆烟墩下四女連夜脫走一宿到馬營  
准此會同副總兵紀廣等議得係干番中走回婦女傳

說達勒近邊駐劄除整棚見操人馬及行沿邊巡哨官  
軍嚴加隄備外連人具本具題又該副總兵右都督紀  
廣亦題前事本部官俱欽奉聖旨兵部知道欽此欽遵  
抄出到部除審得郭四女與栢玉等奏內相同外叅照  
郭四女所說前項達勒往南行走去邊不遠雖未審是  
何部落及所說前言未委虛的緣本婦係在涑水地方  
搶去先前額森入寇之時正從此處回還本婦被虜在  
彼今又帶同前來則知前兵係額森部落無疑若不早

爲區處嚴謹隄備即目雨水沾足青草長茂誠恐各部  
在於近邊去處駐劄牧放分遣其衆四散侵擾非惟邊  
人不得田作而日加疲敝抑且道路梗澁不通而難於  
饋運則人心終日驚疑邊備愈難措置臣等會同總兵  
官武清侯石亨昌平侯楊洪及左右副總兵叅將都督  
孫鏜范廣過興張義遊擊將軍石彪雷通等議得前此  
雖侵犯之跡未著而寇邊之意已萌防微杜漸不可不  
慮除選差乖覺夜不收星馳前去懷來宣府令彼處鎮

守總兵等官一體差遣夜不收同去獨石馬營等處密切哨探是否帶有家小人衆即今見在何處屯駐其人馬號色是何部落有無南牧犯邊之意作急從實回報如果事情緊急臣謙先行親詣懷來宣府等處計議相度寇勢衆寡事情緩急仍令石彪雷通帶領原議奏官軍六千員名每人關與銀一兩布二疋炒五升隨即啓行前去懷來屯駐相機行事務在奮勇設謀以濟邊務既不許擁兵自衛坐蠹糧儲亦不許率易輕出致墮狡

計及行總督軍務工部尚書石璞副總兵右都督紀廣  
叅將都督僉事楊能提督獨石等處都督僉事董斌孫  
安并贊理軍務左侍郎劉璉等將石璞原先議奏挑選  
宣府龍門懷來萬全官軍一萬餘員名兼同石彪等帶  
去官軍相看外兵衆寡事勢緩急若是此次四散出沒  
可以乘虛掩襲就便調遣官軍或乘夜撲捕或按伏邀  
截務要成功以挫其鋒以遏其進以壯軍士之氣以安  
邊人之心設若其勢浩大難於爭鋒務要堅壁清野持

重自守差人馳奏京師調遣大軍總兵等官統領前去  
臣謙就便督同隨宜設法分投應援庶幾有備無虞邊  
事不失仍令戶部設法措備糧草本部通行大同遼東  
陝西延綏甘肅寧夏永平山海密雲古北口居庸紫荆  
倒馬白羊偏頭鴈門廣昌等處關口總兵鎮守官員各  
要整搦人馬用心隄備遇警相機行事不許因循怠忽  
致有疎虞及照走回婦人郭四女間關跋涉回自異地  
首先傳說邊情合無令禮部量與賞賜發回原籍給與



完聚以爲方來之勸緣係處置軍務及奉欽依兵部知道事理具題景泰二年五月十七日奉聖旨是欽此

兵部爲聲息事內府抄出鎮守大同右少監馬慶題該後軍都督府備兵部咨呈該臣等准左叅將右都督方善手本據雙山兒墩外地名石窟山哨探夜不收任奴兒等報景泰二年六月初一日瞭見境外正北柳河溝內有火一處約離一十餘里至初二日見達靼一百餘騎順河往東去訖及據東土山等墩瞭見烟火并放砲

等因具本該本部官奏奉聖旨這聲息未見何處敵有無侵入邊境兵部便差人鋪馬裏去著郭登等哨探是實星夜奏來欽此欽遵查得近據守備天城都指揮孫瑛備守東土山墩哨守指揮談話呈本月初三日該守接界懷安衛尖山兒墩百戶馬興呈送番地走回婦女一口王妙善係遼東廣寧右屯衛中所百戶黃泰下小旗李用妻正統十四年七月內被達靼搶去草地隨住說稱邊外有游兵三營搶我的一營約有八十餘人去

老營裏偷馬未回止畱男婦五十餘人趕馬百餘匹在  
東北下營近邊藏躲至五月二十日至晚妙善得脫走  
回又該青松嶺墩小甲張子名呈報瞭見先前在柳河  
裏駐劄達勒俱騎牽馬疋於初三日往東去訖又於本  
年六月初九日該守周家嶺墩大同前衛指揮王璫備  
鴉兒崖墩百戶郭瑛呈本月初七日瞭見迤北海東走  
回婦女一口到墩呈送前來審係直隸順天府固安縣  
民人張林妻孟氏正統十四年十月內被達勒搶去有

烏梁海達勒約有一千餘人不肯跟同額森回去將氏帶去海西頭隨住後各人去老營偷馬二次被額森人馬搶殺人口數多其搶氏本營達勒十數餘人景泰二年六月初六日在地名梁城兒起營往東北去訖不敢近邊侵擾遺氏得脫四日夜走回除將各婦遞回寧家外會同總兵官定襄伯郭登等議得前項邊患係烏梁海達勒欲往北去恐被額森搶殺欲往南來又懼官軍勦捕俱各四散隨逐水草潛住並不曾入境除整棚軍

馬隄備外緣奉欽依回奏事理具題該本部官欽奉聖  
旨兵部知道欽此又該總兵官定襄伯郭登亦題前事  
通抄到部查得先該本部爲照宣府并龍門等處總兵  
提督等官節次具奏并番中陸續走回男婦傳說獨石  
馬營等處往來出沒達靼多係烏梁海種類其數不多  
若不出兵追勦誠恐敵人愈肆等因奏准行令宣府總  
兵鎮守等官隨宜設法調兵出境勦殺續該鎮朔大將  
軍總兵官昌平侯楊洪奏督令董斌領軍在於石溝等


處哨遇烏梁海兵馬對敵擒獲達靼人口解京近又該楊洪等奏龍門千戶所等處有達靼七十餘人議差叅將楊信等領兵去彼追勦等因具題除通行外今照馬慶等所奏雙山兒等處哨見達靼及據走回婦女說稱前次亦係烏梁海之人先在獨石馬營等處搶掠因見楊洪等不時遣將出軍截殺以此又去大同地方況前次其數不多一向在邊剽掠既不跟隨額森往來出沒不定若不早爲設法令各邊出兵夾攻不無長奸縱敵

邊人難以田作今郭登等止是奏到瞭見邊患緣由不見發兵勦捕方略合無行移該府差人馳驛齎文與郭登等再差乖覺夜不收四散哨探前寇即今見在何處屯劄頭畜實有多寡如果的係烏梁海種類其實不甚浩大可以發兵勦殺就便挑選精銳官軍選委驍勇慣戰頭目統領密與楊洪楊信期約或乘夜掩襲或據險按伏或俟其四散牧放之時瞰其分抄邊境之際務在內外夾攻表裏襲擊以成剿寇之功以挫伏戎之勢以

壯軍士之氣以安邊人之心其有功官軍人等朝廷自有重大陞賞不許逡巡畏縮怠惰因循外假慎重之名內懷偷安之計主將無敢勇敢愾之心偏裨無協力贊襄之道縱敵剽掠略不經心以致邊事日弛其愈得計本部仍行昌平侯楊洪照依先次議奏令叅贊楊信等務要計出萬全事無一失仍要期約郭登等軍馬和同計度相機行事不許自分彼此因而不能成功緣奉欽依兵部知道事理具題景泰二年六月十四日奉聖旨



是欽此



忠肅集卷一

欽定四庫全書

集部  
忠肅集卷二

詳校官編修<sub>臣</sub>翟槐

中書<sub>臣</sub>劉源溥覆勘

總校官檢討<sub>臣</sub>何思鈞

校對官中書<sub>臣</sub>李巖

謄錄監生<sub>臣</sub>李希賢

欽定四庫全書

忠肅集卷二

明 于謙 撰

北伐類

兵部為邊務事照得近該衛拉特額森續差使臣察赤輕等二十七名來京進貢該宣府總兵官右都督紀廣等問討鐵牌看驗說無止有番書一紙差伊帶領朶顏三衛部下來因為阿魯台和寧王的根脚在三衛來取不與著軍馬來收三衛如今放回怕邊上人驚差我領他

每來朝見今三衛老小車輛盡在小黃河牛頭山一帶  
住劄打圍等因本部已經覆奏通行隄備去後今照朶  
顏三衛其衆素號驍悍叛服不常不耻敗亡敢為剽掠  
觀勢強弱以為從違先因額森犯邊各種部落多有結  
連往往在於近邊去處潛藏出沒剽掠人畜其為邊患  
不可勝言既被額森收捕今又放令回還名為在邊住  
種其實奸詐難測安知不為額森腹心而為我邊患害  
况小黃河牛頭山一帶正係彼之出入要途不可不備

今既察赤輕帶領來朝若便待之如常置之不問非惟  
不足以發其奸抑且不足以弭其患合無令通事都督  
僉事昌英等將察赤輕帶來朵顏三衛使臣嚴加曉諭  
備述先前擾邊之罪朝廷恩同天地因其臣順來朝一  
切不問爾等當感恩思報毋蹈前非仍請勅令其賚回  
曉諭朵顏三衛頭目人等爾等蒙國恩開設衛分享有  
官爵務要敬順天道尊事朝廷鈐束部落以為我邊藩  
籬若有外兵侵擾必須奮勇勦殺以除邊患或有迤北

走回人口不得邀截殺害就便差人護送來京朝廷陞  
賞不悵若違背天道辜負國恩犯我邊疆朝廷調度大  
軍勦殺必不容貸如此庶使恩威得以並行邊人知所  
感懼緣係處置邊務敵情具題景泰三年正月十二日  
奉聖旨是欽此

兵部為被擄走回人口事內府抄出鎮守陝西內官王  
莊兒等題景泰三年正月初二日酉時准總兵官征西  
將軍都督同知張泰等手本景泰二年十二月十九日

據黑山營哨備署都指揮僉事任信呈送被擄走回男婦三名口到官會同鎮守太監來福副總兵都督僉事馬讓叅贊軍務右僉都御史韓福審據韓成供係寧夏中護衛左所百戶毛俊下選操土軍陝失丁戶內餘丁先於景泰元年正月初十日被達靼賽罕王識字人額稜特穆爾搶去跟隨到於地名圖拉河老營住過是城因曉番語今年秋間聞知額森差使臣赴京進貢留下從人五百在於口外駐劄等候使臣同回後又聽得額



森怪恨托克托布哈王要人馬去征殺了要著他的外甥  
阿喇卜丹王的男做王子有阿哈拉呼知院不忿領部下一  
枝人馬又有哈喇沁三千人馬都投順托克托布哈王去  
了有托克托布哈王整點人馬要與額森廝殺有賽罕王  
得知收拾人馬報與額森一同前去鴻呼爾噶地面躲  
避有額森又將原收訛專一枝人馬連家小都放回原  
地方去了等用著你時來成等跟隨額稜特穆爾行了  
十程至十一月二十日夜同妻李氏商議約同直隸寧

山衛右所百戶賈貴下總旗孟成共偷兒驕馬七匹黃  
夜脫走沿途倒死五匹於本年十二月十八日到於黑  
山營轉送前來據供告報等因准此叅看得緣係走回  
人口告報境外番情事理專差舍人吳能齎本具題該  
本部官欽奉聖旨兵部知道欽此又該鎮守陝西興安  
侯徐亨亦題前事通抄到部除走回人口另行外查得  
近該迤北走回男子段大口等說稱額森要與托克托布  
哈讐殺等因本部為照額森之與托克托布哈其讐言嫌疑

忌之心非止一日今稱讐殺理或有之又恐番情奸詐假以讐殺為名意在犯我邊境不可不備已經節次奏准行移各邊各關總兵鎮守等官嚴加隄備去後今抄前因叅照走回男子韓成等所說聽得額森怪恨托克托布哈要領人馬去征殺著他外甥阿喇卜丹王的男做王子一節緣與段大口等所說事情頗同及稱有阿哈拉呼知院同哈喇沁人馬都投順托克托布哈王等因緣哈拉呼在彼人中頗知道理畧曉天道人事必是因見額

森邪謀彰露厲階已成且恐不利於已以此結連投順  
雖傳說之言未見的實然以理揆之也先違天悖德罪  
惡貫盈或者鬼啓其衷使其自相吞噬以速滅亡且外  
番相攻中國之利先事預備防患之策萬一外兵果於  
自相攻擊其潰散敗亡之衆不無有歟我邊誠恐所在  
總兵等官倉卒之際處置乖方失誤事機未便合無令  
該府差人馳驛賫文與各邊各關總兵等官務在整飭  
人馬固守地方若有外寇近邊來降覆審明白果無虛

詐就便差人伴送赴京其有散亡部落或在我邊地方  
潛形隱跡或相率侵擾必須哨探來衆多寡斟酌形勢  
強弱可以乘虛襲取即便挑選官軍運謀設法出其不  
意掩其不備奮勇勦殺仍星馳差人具奏有功之日朝  
廷陞賞不吝仍令各邊總兵等官務要上念皇上委任  
之隆下軫邊事付託之重當邊人間隙之際正將臣立  
功之秋時不可失志不可餒凡在邊内外文武官員十  
分用心公同計慮相機而行以靖南牧之烽烟以為邊

方之保障既不許逡巡退縮以悞事機亦不許輕率無謀以中狡計緣係處置邊務及奉欽依兵部知道事理具題景泰三年正月十四日奉聖旨是欽此

兵部為邊務事該欽差總督軍務少保兼兵部尚書等官于謙等題近該各邊送到走回人口屢報番長托克托布哈與額森讐殺而大同等處亦報烟火聲息臣等切惟額森違背天道辜負國恩一旦無故生釁侵擾邊境荼毒生靈雖悔過據誠遣使入貢而罪大惡極終不可

容臣謙備員總督臣亨叨任總兵日夜兢惕思所以報朝廷之恩思所以雪前日之耻今豺虎自相吞噬是天授以復讐之機而不可失也且外敵驚散擾亂必來窺伺我邊今春東作之時未免有妨耕種若非振以兵威令其遠遯則邊方屯田之事恐未能成臣等再三計議欲各統在京馬軍五千臣謙往宣府臣亨往大同其餘將佐於范廣楊俊孫鏜過興張義雷通石彪郭英劉深崔福劉鑑等內定奪前去蓋京師非無軍馬若帶去太

多恐費邊儲且兵貴乎精不貴乎多故也臣等到邊遇  
警則所在各城軍馬悉聽臣等調度如敵勢大必用添  
軍勦殺另行奏請定奪如蒙允臣等所請就將三營團  
操軍馬內挑選停當整理部伍收拾軍裝什物等件至  
二月中旬以後天氣漸和啓發前去兵部仍先行各邊  
各關整搦軍馬以為聲援預備策應其餘軍前合用事  
件臨期具奏臣等素乏謀勇之材又無勲閥之望叨受  
恩寵任寄兵戎苟於此時而不奮忠義之氣竭涓埃之



報則是負天地生成之恩其於天下後世之清議亦有所不容者臣等昧死具題景泰三年正月二十二日

兵部為聲息事兵科抄出守備永寧都指揮同知周全等題准管墩都指揮僉事向賢咨備高山墩軍人馬肆等報三月十一日酉時瞭見境外東北烟火一處相離本墩五里又瞭二人身穿青衣一人身穿黑衣俱到墩下行走等因備咨准此叅照前項達韃出沒恐有侵犯邊境除呈鎮守懷來永寧右叅將都督僉事楊信等處

并差夜不收千戶楊策等前去爪探本日夜據原差官  
軍走報本日午時到高山墩四海冶王達子莊緝見前  
項步行達靉三人仍在彼往來行走當即放砲一箇各  
墩接連舉放復從舊路去訖得此誠恐彼衆誘我官軍  
出境在彼四散埋伏侵犯邊境已將見操官軍整棚隄  
備外緣係達靉出沒事理具本專差夜不收小旗侯勝  
親齎具題又該奉御王整等亦題前事又該宣府左叅  
將都督同知楊能題為走回人口事先准鎮朔將軍總

兵官右都督紀廣咨景泰三年三月初六日酉時准提督獨石馬營都督孫安咨開獨石迤南高山墩平坡舉烟一把黃土嶺平地舉烟一把俱未息滅備咨會同鎮守等官右少監栢玉等議得先該孫安屢咨三月初九日修守獨石馬營今又報瞭烟火不遠為此議撥馬隊官軍一千員名咨臣統領於本月初七日起程間又准後軍都督府咨准兵部咨呈為聲息事咨臣等量選官軍前去策應臣已於本月初九日卯時到於赤城會同

都督孫安將原守官軍家小護送至晚到於馬營安挿  
至初十日酉時據守備雲州堡都指揮沈禮呈本年三  
月初十日未時該提調墩臺指揮劉寧備守青石嵯夜  
不收梁小十二報瞭見嵯下達鞞二人行走當即問據  
內一名董清係遼東廣寧中衛左所百戶劉敬總旗陳  
居子下軍人董興旺男先於正統十四年七月二十一  
日被托克托布哈王部下達子必齊克圖搶去不知地名住  
過至景泰三年二月內不記日期同搶去邊外人口小

廝脫走一月偷騎馬三匹說稱中途倒死一匹行至長城外有不知是何部下達鞬約有三千餘人馬在長城東行走將原來馬二匹偷去步行到於嗟下連人呈送到臣會同都督孫安隨差原帶通事千戶華圖和尼審得數內一名小廝係開元人自幼被邊人搶去失記衛所姓名一名董清係前項衛所餘丁自阿爾台地面走回一月方到長城至夜將騎來馬二匹偷去天明爪探止有十餘匹馬蹄踪跡具說與原來呈文語言前後不

一緣係走回人口傳說外敵事情未委虛的除將原來軍馬整擄齊備於馬營堡駐劄遇有報到聲息相機會勦及行總兵官右都督紀廣等行屬提備外理合具本順差夜不收百戶錢鏞親齎具題又該提督獨石等處都督同知孫安亦題前事該本部官俱欽奉聖旨兵部知道欽此欽遵通抄到部除審走回男子董清小廝二名所說邊情與楊能等奏內相同外叅照永寧地方切近居庸關及天壽山等處今止有達靼步行三人入境

雖埋伏之兵難測而瞭見之兵止此又況本部先前節  
有議奏通行各處守邊將臣遇有緊急軍情務要相機  
守戰而周全等却乃畏縮無謀明知外兵入境其數不  
多又無馬匹可以馳驟故意虛放炮火使之驚散並不  
發兵截殺挫邊人奮勇之心長外兵奸宄之計萬一巡  
哨官軍失於瞭望又似龍門千戶所平湖墩臺已被攻  
坍將夜不收殺掠貽害邊徼決非細故兼且哨見無馬  
外兵三人尚不敢出倘遇劫敵四散入境豈能前驅推

原所由盖因提督懷來永寧都督楊信平昔號令不行以致所部頭目怠忽悞事再照走回男子董清說稱長城不知是何部落達靼約有三千人馬一節訪得都督楊俊說稱長城只是離邊三十餘里顯是外兵已近我邊必有窺伺侵犯之謀及查得達靼將平湖墩攻坍殺掠夜不收軍人蔡英等本部已將提督官都督孫安及守備都指揮張壽等叅奏行令各官聽調勦殺使其以贖前罪經今日久勦殺功蹟茂聞外兵縱橫自若雖董



清等傳說三千未必寔有是數其部落雖非額森之衆  
必是烏梁海三衛殘民遺孽受彼節制故向在潮河川  
長城一帶潛藏因見我邊將臣畏怯不敢襲殺往往乘  
虛窺瞰剽掠似此畧無忌憚出入自由若非振以兵威  
折挫其勢其患不止於攻坍塌臺殺掠夜不收而已即  
目獨石赤城等處正要設法儲運糧儲又係邊人畊種  
時月一旦糾衆突入為寇豈不有悞邊方大計合無令  
該府差人馳驛齎文與楊信嚴督都指揮周全等差人

哨探前兵若是仍在近邊去處隱見出沒哨有的確蹤跡就便量帶精銳官軍多方出奇乘機勦殺以贖先前怠忽悞事之罪務在量敵而進不許輕率誤事如果探無下落持重固守相時而動如違定行叅奏一體治罪及齋文與孫安楊能公同計議先差乖覺夜不收哨探敵營下落備得兵數之多寡兵勢之強弱如果可擊隨宜設策或日則伏兵趁草喂馬夜則銜枚倍道兼行出其不意攻其無備以成擒殺之功以壯軍士之氣以便

邊城之備運以興邊境之屯田有功官軍朝廷陞賞不吝不許偏執已見剛愎妄為圖保一時身家乃忘經久計慮及謀不先定意圖徼倖致中狡計自取罪愆又查得近有奏准事例迤北走回男子有情愿投充勇士者准令收充勇士送御馬監養馬遇有調軍出口剿殺令其指引道路今審走回男子董清小廝俱情愿投充勇士看得各人俱各精壯乖覺合無照例收充勇士送御馬監養馬定於武驤右衛食糧聽候差用緣係處置番

情并走回人口及奉欽依兵部知道事理具題景泰三年三月十六日奉聖旨是欽此

兵部為走回人口事兵科抄出鎮守大同總兵官定襄伯郭登等題准左叅將右都督方善咨據陽和衛貓兒莊墩哨備指揮王瑛備本墩百戶黃忠呈該瞭高軍人薛友亮等執瞭見境外正北有一人騎馬前來到墩呈送到職審據候敬供係大同前衛後所餘丁先於景泰元年正月內在於本城西南錫蠟溝牧放牛隻被額森

下軍人岱爾下平章搶掠送到迤北一向在彼住過有  
額森今年正月內將平章放回往南行到撈鹽海子被  
額森差軍人前來將平章當住後額森將平章就連老  
小放回往東行走本役於景泰三年三月十五日夜騎  
馬一匹走回本役在營時聽得軍人說稱托克托布哈  
領人馬與額森廝殺額森得勝將托克托布哈趕往東  
北去了後托克托布哈領好人馬復來要與額森廝殺  
額森得知就領人馬往西北去了又聽得額森說若是

托克托布哈趕上我就便與他講和陪話備供連人馬  
皆送前來會同太監裴當右少監馬慶審得侯敬於前  
項年月日被額森頭目都爾本平章下軍人錫里岱搶  
至迤北送與達剌博台處隨住景泰二年十月內有額  
森將都爾本平章人馬約有四五千人放回撈鹽海子  
北邊住劄二月復調回與托克托布哈廝殺敬在營看  
放馬牛不曾跟去景泰三年正月內都爾本平章領人  
馬回營聽得二十年搶去漢人說額森將托克托布哈

殺敗托克托布哈往東北去訖又說托克托布哈若趕上我時就便順他趕不上時罷本年三月十七日都爾本平章領人馬起營往遼東地面種田敬跟隨兩程得脫偷騎馬一匹晝夜行走五日到遼等因叅照本人所供言詞與前咨不同及稱托克托布哈要借人馬還與額森廝殺一節與節次走回人口所說不同中間恐有未盡情由具本差人伴送具題該本部官欽奉聖旨兵部知道欽此欽遵又該鎮守太監裴當及山西行都司

都指揮使孔旺等俱題前事通抄到部除審候敬所知  
前項敵情與奏內相同外查得先該節有逆北來降番  
人及走回男子徃徃說稱托克托布哈王被太師額森  
人馬殺敗或言托克托布哈已被殺死或言將帶人馬  
徃東去訖等因及稱櫃子山見有屯駐達靼本部已經  
不次具奏通行各邊總兵等官嚴加提備行令大同總  
兵官定襄伯郭登差人密切哨探櫃子山外兵有無見  
在動靜何似若果別有犯邊情由宜從相機守戰去後



今侯敬又說稱托克托布哈要住北邊借毛人毛馬來  
與額森廝殺有額森往西北去了說稱托克托布哈若  
趕上之時就便順他趕不上時罷等語雖前後不同未  
委虛的設使果如侯敬之言托克托布哈借兵與額森  
讐殺自相攻擊彼既自有釁端顧籍不暇豈能別起奸  
犯我邊境所謂敵自相攻誠為中國之利但事情未可  
深信而隄備不可不嚴合無通行在京五軍三千神機  
等營并各邊各關總兵等官各要整搦人馬加意訓練

務俾號令嚴明兵備修舉勿謂外兵啓釁而有懈怠之意勿謂目前苟安而忘經久之圖務俾有備無患期保萬全又查得近有奏准事例逃北走回男子有情愿投充勇士者照例收充勇士不愿投充勇士者發回原衛原籍優免差役終身今審得餘丁侯敬情愿原衛其帶來馬一匹已送內府交收合無送禮部照例給與馬價令該府差人沿途應付口糧送去大同總兵官處轉發該衛隨住照例免其差役終身緣係處置走回男子并

奉欽依兵部知道事理具題景泰三年四月初八日奉聖旨是欽此

兵部為聲息事內府抄出鎮守寧夏直殿監太監王清題景泰三年九月十四日據宿魏口外淡溝塘哨探夜不收景彥成走報本月十三日酉時分瞭見正西水窩有敵兵八人騎牽馬一十五匹到於賀蘭山後口外松林內砍打椽棒至戌時分馱往舊路去訖得報會同總兵官都督同知張泰右監丞王春副總兵都督僉事馬

讓叅贊軍務右副都御史韓福議得外兵原無定止惟  
往來趨逐水草今次採打椽木必有所見况兼秋高馬  
肥正敵出沒之際顯是近邊窺瞰虛實動靜故以少敵  
引誘官軍意在聲東擊西緣敵情譎詐俱難測度除當  
調馬隊官軍三百員名委署都指揮僉事任信管領於  
十五日早先行出口密切爪探隨又調選二千員名議  
委副總兵馬讓右監丞王春管領神銳太監馬平統率  
於十六日出境前去遇有外兵近邊潛住相機掩襲勦

殺及通行東西二路左右叅將都指揮使熊震王榮嚴督沿邊墩臺營堡哨守官軍晝夜仔細謹慎隄防外緣係調兵出境哨探勦捕外兵事理具題又該總兵官都督同知張泰等亦各題前事又該鎮守大同太監裴當及總兵官定襄伯郭登山西行都司署都指揮使孫英等各亦題稱景泰三年九月二十四日節該左右叅將方善許貴開報大同前後威遠陽和高山等衛黃山坡威寧十分嶺等墩瞭見境外正北偏西正西偏北及正

東俱有烟火一二處約遠二三里等因因又該提督獨  
石馬營等處都督同知孫安鎮守獨石內官弓勝等各  
題稱景泰三年閏九月初三日戌時雲州墩青石嵯等  
墩瞭見境外正東火光一處離墩約遠一百餘里等因  
該本部官俱欽奉聖旨兵部知道欽此欽遵通抄到部  
叅照所奏前因係干烟火聲息况寧夏所報邊情已見  
敵兵八人入境雖稱砍打木植馱載去訖誠恐此敵懷  
蓄奸計指以採木為由故意窺伺虛實別有糾衆侵犯

之謀又况寧夏遠在黃河之外遇警卒難策應兼且大同獨石等處近日節報烟火不絕綿亘接連動經數百餘里既有形跡必有實情若非遣使來朝必是揺毒扇禍若不預為防範未免臨期有誤合無令該府差人馳驛齎文與寧夏總兵官張泰公同叅贊鎮守等官整搦人馬固守地方仍差乖覺夜不收分投哨探前敵有無在邊出沒務在相機戰守以安邊鄙以除禍害不許自相子盾推調畏縮縱敵長奸因而疎虞大計自取罪愆

仍齎文與大同獨石等處總兵等官郭登孫安紀  
廣江福許貴方善當此邊報絡繹之際邊情未定  
之時各官必須十分謹慎隄防若果事出非常度  
其可戰則運謀設策互相約期出兵截殺如其不  
可則堅壁清野持重固守仍一面星馳奏報如或  
其首遣使到邊或稱朝貢或稱打話亦須審勢度  
情隨宜措置不許怠忽致有疎失緣係係處置隄  
備邊情并奉欽依兵部知道事理具題景泰三年閏九



金史卷一百一十五  
卷二  
月初八日奉聖旨是欽此

兵部為預備邊務事內府抄出鎮守大同太監裴當題  
該後軍都督府准兵部咨呈兵科抄出總督軍務少保  
兼太子太傅兵部尚書等于謙等題該右僉都御  
史李秉題稱敵中差來使臣鴻臚寺序班楊冕  
男楊玉說稱額森老營只今安在哈爾滿地面  
住坐統領精兵見在沙窩一帶藏住等因會同  
總兵官太子太師武清侯石亨等計議得敵

首額森違天悖理志驕氣盈假以進貢為由遣人瞰我虛實而又糾集虎狼之衆日漸近我邊方侵犯之謀既已彰露隄備之策不可不嚴其大同地方雖係緊要相離京師遠卒難應援兵部節次行移總兵等官郭登等令其計議應否遣將增兵而各官執稱糧草不敷并敵使來朝不必增添難便定奪合無再行郭登等計議如果應合遣將領兵前去調遣戰守

徑自具奏定奪等因具題節該奉聖旨懷來操備一節  
待明年春暖緩急定奪欽此欽遵會同總兵官定襄伯  
郭登等及都司衛所管事管操等項都指揮等官孫英  
等議得敵首額森指以進貢為名糾集虎狼之衆故彰  
聲勢逼近邊隅肆其無厭之求邀以難從之請名雖曰  
和實則啟釁然制敵之道在於有備無虞用兵之方貴  
乎知彼知己今大同現操官軍除東西二路外馬隊官  
軍止有六千餘員名以近守則有餘以遠戰則不足步

隊官軍雖有八千八百餘員名止可排營列陣不能爭  
先趨利數內亦有精壯好漢為因無馬俱各步操如蒙  
聖恩憐憫遣城兵力寡弱乞勅該部量撥精銳馬隊官  
軍一萬餘騎前來餘外另帶附餘馬數千匹每馬就馱  
行糧數斗糧則給軍食用亦可存省遣儲其附餘馬匹  
聽臣等於步隊內選人騎操如若馬步軍士數少即於  
正統十四年原選各衛所餘丁并大同府民壯查照原  
來量為增減整點齊備聽候有警相機調用如此則軍

威強壯邊事可以有為人無浮冗供給不致缺乏臣等  
再照大同府四川七縣之民生長邊方安其習俗性既  
勇悍尤耐饑寒自昔至今多有腹裏及迤南衛所充當  
軍役其各該衛分有二三千里有五七千里者或歲久  
年深拋家失業者供役者少事故者多或因路程寫遠  
中途死者有之或因不服水土到衛死者有之或因貪  
賊官吏受囑賣放者有之起解者未至逃亡者復來該  
衛無實用之人原籍有清勾之擾既僉長解又斂盤纏

況今兵燹以來鄉里凋零至極軍伍既不能足民戶因  
而靠損其本府州縣官吏里老累次於臣等處告稱艱  
難若得就近於大同等衛所當軍情愿自備鞍馬不敢  
便支糧賞奮勇殺敵以圖補報臣切惟天下衛所相同  
者多祖宗制度難於更改但國家政務有經有權兵家  
事機有急有緩今者北陞之於西邊大同之與他處非  
惟理勢輕重有不同其實事機急緩之懸絕若不先其  
所當重者急者而後其所當輕者緩者則守經用權之

道未見其可如蒙准題乞勅該部從長計議除太原府等處邊衛軍役外其餘不拘在京在外衛所校尉力士旗軍幼軍等項今後遇有逃亡事故在營無人補伍例當清勾者不為常例俱各於大同就近照名充當軍役聽其自備鞍馬暫且不支糧賞於大同前後二衛帶管收操待後積有數多另立衛分管轄仍行原先衛分開豁籍冊永不勾補緣此等之人既免背井離鄉之苦得遂安家戀土之情若使撫恤有方教演有法遇有緊急

一則不忍棄其祖宗墳塋一則不忍毀其宗族產業無  
不心懷敵愾樂於戰鬪比與山西河南調來操備官軍  
主客既殊堅脆亦異庶使民戶無分析之患軍衛獲有  
用之兵所謂一舉而兩得也緣係計議回奏請旨調發  
京兵及改調軍役事理具題該本部官欽奉聖旨兵部  
知道欽此又該鎮守大同總兵官定襄伯郭登等亦題  
前事通抄到部案查先為前事已行勘議去後今抄前  
因叅照奏要量撥精銳馬隊官軍一萬餘騎就帶附餘



馬數千匹前來操守一節查得在京各營官軍見蒙勅諭選揀一十五萬團營操練聽調殺敵其餘次撥官軍又有運糧等項差占數多況大同各城蓄積糧草有限供給彼處官軍尚且不敷節有奏報聲息未有十分緊急若是添撥官軍前去操守不無坐食邊儲愈見凋耗兼且京師守備為重官軍難以輕動合候有警之日另行奏請命將發兵前去策應其前項馬匹合無行移太僕寺揀選一千五百匹令郭登等差人關領前去給與

選出步隊精銳官軍并彼處舍餘民壯騎操應用其稱  
要大同府所屬州縣清解各衛所校尉力士旗軍幼軍  
等項俱於大同附近衛充當軍役一節緣校尉力士幼  
軍俱係隨侍等項緊要人數又兼其數不多難以存留  
外所據清解各衛旗軍合無准言不為常例存留彼處  
操備聽調殺敵候邊方寧息另行定奪仍令各該有司  
軍衛將清勾收發過旗軍姓名通類造冊繳部以憑查  
考不許指此為由生事擾害緣奉欽依兵部知道事理

具題景泰三年十二月二十六日奉聖旨是欽此

兵部為邊務事該欽差總督軍務少保兼兵部尚書于謙等題近該延安綏德并遼東等處節次瞭見人馬烟火除行隄備外切惟敵情奸詐變態百端雖稱遣使來朝奸詐未易測度況敵使之來需求無厭或取討遠年人口或請要差遣使臣雖聖恩特賜寬容終不能滿其所欲且今次差來使臣彼處數少回回數多此輩將及回還而各邊屢有聲息并宣府又報敵使拆牆入境切

恐敵酋故以使臣緩我却遣人分投侵擾尤恐闡勒瑪  
哈穆特并察展等回還因其不滿所欲遂爾別起釁端糾  
率其衆為我邊患未便臣等會同計議得萬一敵情變  
動則宣府大同與陝西離京至遠連接三邊而外敵又  
屢有侵擾之謀合當嚴慎隄備大同係緊要邊方自經  
擾攘之餘軍民凋瘵未復加以糧儲數少馬草不敷兼  
且路途頗遠懸隔關隘倘有警急難於策應欲臨期調  
兵則恐緩不及事欲預先增兵恐坐蠹種草有此兩難

不可遙制臣等議得若宣府有警則京師約量敵勢多寡調兵前去策應陝西沿邊一帶合預先請勅令總兵鎮守叅贊内外文武官員各要整搦軍馬固守地方凡要害去處俱要分兵拒守差人哨瞭遇警相機行事可戰則戰可守則守務在計出萬全事無一失凡一處有警則隣近去處互相策應有功則一體陞賞誤事則厥罪惟均不許自分彼此坐視不理以誤事機大同請勅郭登年富方善許貴等并太監裴當等公同計議若大

同有警各人設何方畧可以禦敵作何布置可以克敵  
彼處軍馬糧草可否勾用應否京師命將統兵預先  
去策應或不須京師調軍自可濟理邊務斟酌自己  
強弱廣詢下人輿情明白從實具奏毋得偏執苟且致  
貽邊患若奏請至日如果應合調軍臣謙照依比先奏  
奉欽依事理領軍前去總兵叅將等官於團營數內  
臨期奏請定奪仍行戶部查算各邊現在糧草數目  
應合預備者就便早為整理毋臨期誤事及照敵使  
回還經過

懷來宣府等處俱係緊要邊境固當振肅軍威使彼知  
我有備彼中糧草有限不宜費用過多合無於都督石  
彪雷通劉深三員內請旨令一員仍充遊擊將軍名目  
請勅帶領原統官軍三千員名前去協同所在官軍守  
備城池以壯軍威候使臣出口回京仍令兵部行文宣  
府懷來獨石一帶一體嚴慎隄備臣等仍將在京各營  
見操軍馬候春暖如法操練以備緊急調用及行各關  
守備等項官員一體固守關隘以備不虞不許怠忽誤

事臣等又惟邊圉為患自古有之惟人君修德於上人臣效忠於下則其患未有不平者皇上撫運中興宵旰圖治今北敵畏威納款皆皇上修德之效臣等俱以駕劣叨膺重寄萬一外兵改慮自速敗亡臣等當捐軀効力以圖殲滅此敵以圖補報國恩若苟祿全身以誤大計罪甘赤族緣係會議邊務事理具題景泰三年十二月二十日各官奏奉聖旨是卿等為國家慮患正當如此但今軍馬戰守之方未有一定可憑恃者卿等使同



各營頭目每從長計議敵果入境如何可以出戰勦殺如何可以固守無虞敵若不來亦當如何操練軍馬或分或合可以百戰百勝以防不虞務在的然有可憑恃毋事虛言遊擊將軍著雷通充待使臣將起時領軍就關行糧出去事畢回京欽此

兵部為邊務事該欽差總督軍務少保兼兵部尚書等官于謙等題該差臣等計議方略會本具題節該奉聖旨卿等便同各營頭目每從長計議敵果入境如何可

以出戰勦殺如何可以固守無虞敵若不來亦當如何  
操練軍馬或分或合可以百戰百勝以防不虞務在的  
然有可憑恃毋事虛言欽此計議得國之所恃者兵兵  
之所賴者將將得其人則兵無不精兵無不精則國威  
自振而寇盜之患自平矣臣等俱以庸劣叨膺重寄馭  
兵乖方致厯聖慮今議得各營見操官軍已選十萬分  
作五營團操以備出戰每二萬人為一營每隊五十名  
一人管隊每一隊又立領隊官一員每千人把總官一

負每三五千又立把總都指揮一員其管隊把總大小總兵官負各量其才器高下謀勇如何而選用之使之互相統屬兵將相識如遇下教場操練之時臣等出其不意量調一隊或三隊五隊點閱但喚把總管隊官姓名各官自行管領本隊軍士前來內喚出軍士一二人或三五人令管隊把總官識認是何姓名衛所却將軍人懸帶牌面上原開寫姓名衛所年貌查對若有不同就將管隊等官量情責罰仍比較弓箭牌刀長鎗等項

武藝精熟者量為獎勸生疎者一體懲治使管軍者知軍士之強弱為兵者知將士之號令體統相維彼此相識不致臨期錯亂難於調遣大意前項團操軍十萬合則為一營分則為五營萬一外寇侵犯寇多則各營俱動寇少或分調一二營或調一萬三千隨機應敵其平日選定大小該管頭目已定則交戰之時多用則多調少用則少調止調該管頭目則士卒自隨平日相處既久同輩之人易以相機管事之人易以使令如手足

之捍頭目子弟之衛父兄比之平日混同操練不辨強弱不知號令將各營之人逐漸轉合者不同庶幾可以成功取勝又敵之所恃者弓馬衝突而已敵知我火器一發之後未免再裝遲慢以此我軍放罷火器就便馳突前來今若與之對敵我軍列陣外用鹿角遮護持滿以待寇若來緊堅陣不動先以弓弩對敵神銃未發先以火藥爆仗詐之敵必謂我火藥已盡不復畏避馳馬來攻則我軍火銃火砲飛鎗火箭弓矢齊發若勢重又

以大將軍擊之待敵勢動分調精銳馬軍用長鎗大刀  
勁弓射砍步軍用團牌腰刀一齊衝入彼陣或刺射人  
馬或砍其馬足臣等以身率先衝冒矢石獎勵士卒俾  
無退縮如有退縮者即以軍法治之此則臣等愚見操  
軍出戰方合之勢如此仰惟皇上德威遠布兵必不敢  
侵犯京師臣等謹當用心設法將各營已選團操并其  
餘軍馬一體操習整飭隊伍申嚴號令務使人馬強盛  
武藝精熟除團營之外另選次第精壯以備緩急調用

以助團營軍威每日除演習弓馬武藝之外仍令馬步  
官軍兼習陣法及交鋒衝突安營走陣以為戰鬪之勢  
使之耳目慣熟步驟輕健能知進退坐作之法免致臨  
敵畏怯失錯至如固守之法則今日士卒頗多京師城  
垣堅固又有戰車鹿角器具兵縱勢衆可以固守無虞  
雖臣等愚見如此但用兵之法不測如陰陽難知如鬼  
神貴在臨機應變難以一定而求況外兵矯捷去來之  
間如飄風驟雨應敵之際非勇無以挫其鋒非智無以

破其詐必謀勇兼濟而後可以成其功岳飛有言陣而後戰兵家之常運用之妙存乎一心又曰文官不愛錢武官不惜死天下太平矣臣等既蒙朝廷大恩授以重任敢不潔已愛軍以振士氣捐軀効死以報國恩緣係會議戰守事理具題景泰三年十二月二十二日各官奏奉聖旨是兵貴乎精將在謀勇卿等務要同心協力操習軍馬有事運謀或戰或守若無事則撫恤士卒養其銳氣遇警易為調用這等不負朕委託之重欽此



欽差總督軍務少保兼太子太傅兵部尚書于謙等為  
軍務事該各營總兵等官太子太師武清侯石亨等會  
議得迤北敵首額森悖逆天道屯聚其衆近我邊疆若  
不預為設法選練設使遣將調兵軍不識將意將不識  
軍情不能為用今五軍三千神機等營各有總兵掌管  
規矩不同倘遇調遣輾撥前去非惟軍將俱不相識抑  
恐號令不一誤事不小合無於五軍三千神機等營揀  
選精銳馬步官軍一十五萬內五軍營八萬神機營五

萬三千營二萬分為十營一營一萬五千用坐營都督一員五千用都指揮一員共用三員一千名用都指揮一員或指揮一員把總共用一十五員五百名又用指揮一員把總共用三十員每隊用管隊官二員前項坐營把總等官各於營內選揀廉能驍勇之人管領操練俱聽臣等往來提督管操太監劉永成原管神機營阮讓原管三千營取自上裁令其提督操練監鎗內臣隨同前去各營監鎗如有聲息各調官軍若干或用一營

二營三營就著某總兵官及坐營都督統領前去互相策應征勦其餘官軍令的當頭目管領各於本營操練如此庶得號令歸一人易遵守內外兩得其濟臨敵必能成功緣係會議軍務守禦京師事理具題奉聖旨是欽此

欽差總督軍務少保兼兵部尚書于謙等為軍務事先該宣府等處總兵官奏報外兵聲息緊急欽命臣同各營總兵官計議戰守方略臣等已將議到方略逐一開

奏該奉欽依是欽此除欽遵外今照總兵官武清侯石亨同左右副總兵叅將都督孫鏜范廣過興張義等見今挑選到五軍三千神機營頭撥精銳官軍六萬員名分作三營團操內神機營精銳官軍二萬員名均派三營照舊操練外臣等原先議奏方略內要領大將軍砲十六箇并量領大砲飛鎗手把銃以備衝敵之用俱未曾關領今照火砲之具實乃軍威亦外敵平昔所畏必須平居之時領出聽總兵等官設法令軍士演放操習

慣熟量其高低遠近緩急疾徐一旦臨敵方能不亂而有成功又況今日夜不收徃獨石等處哨探回還說稱哨馬營一帶俱有敵兵駐劄其勢浩大竊料此敵候秋高馬肥氣候漸涼不無有侵犯邊方深入為寇之意兵家之事以先戒為寶防患之策以預備為要況神機營撥到官軍數多砲少周匝擺列不敷切恐臨期難於禦敵乞勅工部合無將後項開列銃砲火器等件照數作急於內府關出交與總兵等官石亨等如法收貯隨宜

操演并大將軍砲十六箇斤重數多人力不能背負合  
用馳載車輛亦乞行移工部成造具題奉聖旨是欽此  
欽差總督軍務少保兼兵部尚書等官于謙等為軍務  
事照得先該會官議擬奏准令武清侯石亨都指揮同  
知楊能各統官軍往大同宣府巡邊後因宣府節報敵  
兵近邊欲來攻圍宣府以此暫緩行期數日以來差人  
哨探不見的確聲息顯是外兵窺伺我邊進退未定若  
不整搦士馬遙振軍威切恐外兵驕矜愈加得計臣等

議得合無令石亨將原選定官軍三萬餘員名楊能將  
原選定官軍一萬五千內再添五千共轄二萬員名關  
領賞賜衣甲糧鈔聽候聲息遠近虛實於二月中旬起  
程前去巡邊破敵務在相機行事計出萬全既不許退  
縮畏避以損軍威亦不許深入貪功以中狡計臣等仍  
於各營挑選精兵五萬或六萬亦皆關與鮮明衣甲精  
利器械各委勇敢頭目分管另行操練聽候調用破敵  
其餘官軍一體嚴加操習不許視常怠忽及出口巡邊

追破外敵全憑馬力伏望聖恩量加草料餽養庶使馬  
得臚壯而便於馳驟軍增銳氣而易以効力具題奉聖  
旨是欽此





忠肅集卷二